



ル 5
3134
5



門 儿 5
號 3134
卷 5

南潯志卷二十 昌壽

里人周慶雲纂

人物三

温文炳

温芝田
張元燦

温芝山

李景坡

紀復亨

丁蟾

吳巖

温源起

温士利

温瑤琨

張升吉

張震亨
丹山

張澂

張

丁宗英

丁文錦

丁源

紀豹文

徐德元

董增齡

方熊

方燾

張德奎

計發

夏耀曾

王翰青

丁殿金

丁泗

温純

董傳經

陸唵

陸驥 陸駒 陸貴琛

陸長春

楊鳳苞

楊鳳聲

楊錯

施國祁

邢典

馮鳴盛

温一貞

陸楷

項初

劉桐

温日鑑

郭廷元

紀峻

紀方虎

張鑑

張鎮

范錯

范穎通 范宗鎬 范登 范來庚

孫燮

沈登瀛

沈鍾璜

丁桂

紀慶曾

盛朝勳

董蠡舟

董恂

紀大夏

紀汝霖

沈垚

人周慶

周霈霖

周昌壽

周慶徵

紀思曾

紀奎光 紀六箴

紀五辰 紀七襄

沈益

周良苗

周文魁

周恒

丁宸

董邦楨

温金萼

李景邕

李邦治

温文炳字星若晚號菊隱老人天性至孝家無中人產而施濟不倦以厚德為躬行而化及於宗黨鄉里年八十四端坐而逝子二芝田文行師法歸太僕芝山字養冲號友琴儻負奇氣喜經濟家言丁子復温菊隱傳及温友琴傳乾隆丙子湖郡飢甚有捐瘠於道者芝山惻然刑典温君友琴傳與同志張元燦等請於通判澄海陳公榮議捐賑陳公首捐俸遍勸得銀五千兩語陳公曰經費不難分給難分給不難弱不漏澤強不濫冒難陳公曰此事非君才不能辦非君心不肯辦君其行矣時疫癘甚作戚族多沮留曰

此吾志也一方之人瀕於死義不可止得多活人余焉恤丁遂

以編查為獨任徒步往來東至震澤縣界西至東遷南至輯里

北至瑤田計莊十有六得極貧戶一萬零二百七十七口刑手

注冊給符一口錢四十小口半之一給七日丁傳挨莊判發翕然

稱善兩月事竣刑傳病作竟不起疾革命嗣子曰我家世尚節義

以自便利為大辱非祇辱其身且辱其祖若父我死汝宜益勉

於善年五十有四丁傳

李景坡字雲軒性沈毅具才畧服賈於河南乾隆三十九年教

匪王倫擾亂東昌豫省戒嚴景坡率同志倡辦義團以資守助

事平保舉六品頂戴李氏宗譜

紀復亨字元穉號心齋年曾孫河南商邱縣籍乾隆辛酉順天

舉人王申 恩科進士翰林院庶吉士散館授編修補陝西道

監察御史改隸本籍轉京畿道兼管左僉都御史事陞吏科給

事中京師有閻王張四又號蛇張藐法恣橫特參懲治貴州苗

民承值差務勞逸不均奏請免其偏累充丙戌會試同考官甄

拔稱得人歷鴻臚光祿二寺少卿遷通政司參議尋陞太僕寺

少卿因病乞歸寄居蘇州之楓橋後卒于潯年七十四復亨少

即工詩善書閒畫山水皆超逸有致汪志同里丁蟾字月亭號蓉

齋弱冠入庠舉業外兼工詞賦嘗見賞於紀心齋太僕後張秋

水明經稱其詩隄幽鑿險可奪唐王建張籍之席云潯溪詩徵

吳巖字懷峯號桐村乾隆辛酉舉人大挑選任仁和教諭汪志以

巡撫匿災白諸學使雷鉉翠亭據以入告撫軍落職吳興詩話丁丑

南漳志 卷二十八 人物三

成進士授刑部奉天司主事乙酉貴州副主考歷任福建司員外郎山東司郎中在西曹十餘年審畫詳慎戊子兼編修銜提督山西學政選先正文以示軌則刊三通序以重根柢所拔多名士呈請歸養里居數載嗣丁外艱戊戌服闋入都卒于湖州會館年六十三汪志巖善飲工繪詩話宗婁東派兼工寫意花卉墨林今自題山水詩多清絕詩話先世育于曹自吳江八角亭遷潯故有曹吳同姓之說里人至今稱曹懷峯云汪志

溫源起字彙滄號池客又號蕙窗先世自輯里遷潯曾祖士利饒于資值歲饑罄其財以賙鄰里家遂落再傳貧益甚源起棄舉業專力治生不數年復完舊業有沈某質田于源起沈歿其婦貧不能自存將有去志源起亟焚券歸其田婦得撫孤全節

佃戶錢某迫于逋負鬻其妻為人妾遺之金得贖還又有陳端龍者被人誣扳入獄憐其冤力援之乃出親串中兄弟闔牆構訟其兄求為左袒切責之曰手足可自戕耶其人感悔訟旋息自奉甚約每節縮衣食以濟正用晚年葬同族兄弟七人之棺贈朱文昌之孤以田遺徐聖培以粟姚江謝氏子不能婚則助之徽客吳麟趾櫬不能返則歸之年六十一卒子瑤琨字右良號古愚究易理精篆刻母范氏好施子瑤琨奉命惟謹又推其意修治橋梁如潯西南之龍珠橋其一也汪志

張升吉原名乾元字易門號西塞一號奚疑先世自震澤遷潯升吉乾隆戊子舉人大挑知縣發福建充癸卯鄉試同考官補將樂縣丙午調鳳山縣未履任適林爽文倡變連陷彰化嘉義

二縣鳳山亦爲莊大田所陷丁未三月升吉至台灣大田日犯府城升吉分守小北門招集鳳山餘民得二千人屢出城殺賊奉檄偕副將丁朝雄由海道取東港十一月得而守之三面皆賊一面瀕海且剿且守時賊屯水底寮所擄良家婦女三百人賊黨脅從約萬餘人陰遣武生鄭其仁入寮曉諭禍福戊申元旦有賊目十人叩營投順諭以送還婦女始許降詰旦牛車數十兩盡送詣營各給口糧招親屬領回會將軍福康安統大兵救嘉義復彰化擒爽文還兵剿鳳山賊大田亦就獲鳳山故城荒圯因遷縣治于埤頭勤撫字賑飢民捕餘黨盡獲而貸脅從者無算調署浦城得真西山心政二經中有催科法仿而行之民樂輸恐後復補寧德縣奔父喪歸遂不復出嗜研易理兼善

六壬數然不輕占休咎也嘉慶八年卒年六十五從弟震亨字驚百號小勇少工文有聲庠序書法趙吳興乾隆庚寅恩科舉人早卒從子澂原名珂字佩珊號秋畹嘉慶戊午舉人官鄞縣教諭修學宮忠孝節孝二祠勤於督課率先身教士林稱之升吉孫丹山字儀曾號半屏改名夢沅又改亥昌廩貢生輯潯錄蒐獵故里遺逸之事張氏同居七世崇儉斥奢一庭雍穆恆隨子弟之材而教之或士或商莫不遵循矩訓家法之善爲南潯冠云

汪志

丁宗英字愧庭自號雲谷少勤學爲文章務法先正不詭隨時好故屢困于試年逾壯諸城寶光龔督學浙江始補縣學生爲人忠厚長者犯而不校處兄弟間終身怡怡如也父卒遺負不

貲傾產以償之家遂落與弟分析所得田宅瘠且陋惟以蓄書為喜歎曰後人能世世讀之吾願足矣於乾隆六十年卒年七十一子文錦字綺巖自號力堂縣學生性孝友操行潔白嘗館于外遇珍羞以不能供父母輒不敢食弟朝鎮早卒撫其孤女如已出終日衣冠整肅望之儼然待人甚恕不以己之所能責人故人雖憚其莊而樂就焉幼多病稍長乃自刻苦于學雞初鳴卽披衣坐默誦日所讀書寒暑無間雖行道路亦然由是業大進為諸生有聲紀慶曾少從學好古不屑屑時藝人或非笑之文錦曰今子弟讀書大抵藉聖賢之言博利祿已耳若紀生者乃不愧為讀書人也後慶曾果以通經治古文名于時年五十八以嘉慶十一年卒子源字肇崑幼敏悟年十五徧誦諸

經年十六補縣學生時宗英已謝諸生業與文錦俱以久困場屋日望源以科名顯源承兩世庭訓惟日孳孳為文穿穴經史雄深雅健有劉黃岡風力然終不得舉性好詩喜學東坡至形夢寐故以夢坡自號著有嘯月齋集三卷逮執父喪自痛科名未就不能慰父志長號連晝夜氣鬱于中遂成瘵疾踰年卒年僅二十九

丁桂丁氏
先墓表

紀豹文字幼廉號蔚巖又號霧隱山人乾隆乙巳恩貢歷署景寧嘉善臨海教諭

曉寒樓
雜憶

人極方古年高而腰腳甚健登山不

用杖為詩不假思索出入誠齋放翁之間

耐冷

其任臨海也渡

錢塘舟覆潛行水底十餘里得不死自慶幸生有詩紀其事後

遂不復出優遊林下十餘年與里中耆老結尚齒會於廣惠宮

同會者三十餘人宴飲賦詩深衣朱履鶴髮童顏極一時之盛

曉寒樓雜憶

徐德元字達三號芷堂乾隆丁卯舉人工詩以秋海棠詩見賞於王際華和者徧海內

縣志

吳興詩話

選四川彭山

知縣訓士有方設立書院課程撥聖壽寺山地百餘畝以資膏火會金川叛逆奉使佐理臺站巡撫鄂寶見而問曰能詩彭山

令卽汝乎卽調隨營辦事以功升同知補漢州知州

縣志

後遷居

東郭兜

汪志

董增齡字慶千號壽羣歸安廩生

汪志

博雅士也

王引之國語正義序善治

春秋兼善醫道著述有規杜繹義論語雅言金匱集解江海明珠國語正義

汪志

其國語正義援據該備自先儒傳注及近世通

人之說無弗徵引又於發明章注之中時加是正可謂語之詳而擇之精矣

王序

方熊字飛崖號涓馭縣學生自束髮就傅卽耽聲韻之學中年屢困棘闈遂廢舉子業肆力於詩又雅善蘆雁有所作輒題小詩時與茅湘客姜漁樵諸名宿結漁社羣相唱和後主田園詩社其弟筍岳亦與焉讌集聯吟殆無虛日晚年多病甚至體枯聲啞猶不廢吟詠至疾革時出其未定之稿命筍岳刪存之題曰飛崖詩刪筍岳名肅號淞洋又號裘莊村農府學生少好學師事兄飛崖學詩海鹽朱笠亭稱其詩婉麗明秀如靈和楊柳初日芙蓉於唐近劉文房杜樊川情韻勝也時下飢餒爲博織佻爲工者奚可同論可謂傾倒矣有山子詩鈔十一卷筍岳又

善山水花卉見其稿中有題畫詩世無知者因並拈出

潯溪詩徵

張德奎字聚東號默齋監生秋水明經之父也妙解醫理著桐雷歌訣二卷性慈和有為善最樂之風南潯舊有長生會掩骼

卮施棺槨實其父元熙為之首創繼事益勤迄今弗替卒於嘉慶丙寅年七十有八

潯溪詩徵

計發字發之號魚計縣學生克承家學銳志讀書尤刻苦作詩嘗館于同里劉氏之畫扇樓以古學誨其弟子性和易愛獎掖後進時潯上詩道日衰而里中人士復為興起皆魚計提倡之益也晚年賦祭詩詩皆道其詩境之辛苦有魚計軒詩鈔及魚計軒詩話

潯溪詩徵

夏耀曾字藻亭號少岳縣學生為心谷大令之孫家傳經訓學

有根源又得其節母孔孺人指授少即能詩有小山居偶存稿

及附存稿

潯溪詩徵

王翰青字文虎改字鄂舟號鶴野歸安附貢生少立名譽庠序推重善制舉文屢薦不售尤工於詞深得梅溪竹屋之音自署

鶴野詞客

潯溪詩徵

丁殿金字康侯號柳溪歸安籍隗于小試于嘉慶庚辰始補博士弟子員時年已七十餘矣孜孜好學至老不倦遂于道光戊子 欽賜副貢又于丁酉 欽賜舉人年逾九十耳目聰明行不扶杖而立身行已動遵禮法尤足為鄉里儀式卒年九十有三族弟泗字帶江號文波烏程學生淡于科名一踏省門終身不復至與殿金正相反泗為人勤勉丁氏祖塋宗祠皆在三里

橋舊居一切公事皆洄為經營綜理規條井井出納平允人服其無私曉寒樓雜憶

溫純字一齋號春湄生而穎異五歲從從兄乘珠學即知禮讓稍長博涉經史愛讀詩古文辭嘗因小試謁郡守雷公輪異之曰子氣宇不凡後補博士弟子員旋食廩餼阮雲臺先生視學湖郡詩文外兼訪多士之善書畫者純繪道場山色及秋桑圖以進使者歎賞之比於趙吳興由是聲譽日益上梁同書一齊溫君傳援例就教職官象山縣訓導調處州府學府志兩任學博天若縱之名山勝水之區以發金石之秘手拓六朝唐宋以來志傳未載之題名詩版凡數十件可謂好事矣詩宗白陸書法臨摹晉唐諸家尤工篆刻梁幼受畫法于沈宗騫山水渾灑淵懋力追董

巨其小品尤有別趣人以此之姚雲東陳孟陽云墨林今話其所居

曰墨妙樓藏弄名人墨迹精拓碑版及金石圖史閒牕靜對與

古人為徒輒自意得戊辰七月以秋試至省假歸省母觸熱到

家適遭兩女一時天殤既感且鬱復至省勢不能入闈越半月

竟不起春秋四十有五子皆早殤以兄子邑庠生森樟為後梁傳

著有吳興詩鈔校刊王籊林題跋墨妙樓叢書溫氏家傳

董傳經字厚齋號性存少孤貧刻苦攻書旁通堪輿奇門尅擇

之學性好吟詠嘗北遊燕趙胸次日廓故其詩日益工力追唐

人入摩詰襄陽之室傳經以九歲之孤侍奉節母崔親供菽水

終身不娶節潭溪詩徵

陸唵一名寧字靜川號柳南居南蔣港監生性和易善交友隱

居讀書工吟詠輕財好施鄉里稱為善人子驥字千里天資穎異力學能文與其弟駒字昂若號藿園齊名驥子長春字向榮號辦香又號簫士道光甲辰副貢工詩詞善駢體孜孜稽古不為俗學所羈駒子貴琛原名桂春字獻其號秋士道光庚子舉人有文名

潯溪詩徵

楊鳳苞字傳九號秋室又號荂泝亦稱小玲瓏山樵又稱西園老人歸安廩生汪志博雅邁倫屢試不得志賦西湖秋柳詞以寄意前後積七十二首情味並勝陸以湜冷廬雜識有名於時於經學小學皆有根柢尤熟諳明末事嘗為南疆逸史跋十二篇補溫睿臨之未備而訂其誤尤留心鄉里掌故朱莊史禍為南漳一大案鳳苞旁搜遺軼紀載甚詳烏程陳無軒焯向有湖州詩錄之

輯知縣彭志傑欲付之梓以校補屬之為增錄數百家并攷其爵里志傑旋罷去刊未成阮文達公元督學浙江拔入詒經精舍編經籍纂詁鳳苞與分纂焉布政使謝啟昆聘之入幕以侍老母疾辭不就晚年館于郡城陳氏其書室為鄭菑畦元慶魚計亭人以為菑畦復生云卒年六十四無子兄鳳聲字昆谷號虛舟弟錯初名鳳擊字錫朋號雪篷並有才名早世

汪志

施國祁字非熊號北研縣學生好學不倦工詩古文善填詞尤熟于金源事實嘗病金史蕪雜擬攷正之有所得輒為紀錄年逾四十遂棄舉子業專力以著書自任積二十餘年之久書成名曰金史詳校繼以卷帙繁多乃列舉條目為金源劄記又以其餘緒作元遺山集箋金源雜興詩家極貧少嘗授經于外中

年忽樂市隱寓于潯北爲人經理生業設吉貝肆市中有一樓顏曰吉貝居所著書多成于其中嘉慶己巳秋不戒于火著述盡付一炬今所存者大半出于記憶補錄之餘耳卒年七十餘

無子

汪志

邢典初名大典又名二典字綺封號書城縣學生居垂虹橋下家赤貧讀書談道泊如也每論及歷代象緯輿地兵農食貨諸志與國朝疆域典章悉鑿鑿可證旁通王道醫卜星相諸術晚更棲心內典大旨歸于明體達用不屑屑於章句訓詁與楊鳳苞施國祁並稱南潯三先生卒於道光四年年七十一馮鳴盛字上鳴號篋園嘉慶戊寅舉人授翰林院典簿銜少孤授徒以養母工制藝從遊者甚眾初同里三先生中鳳苞國祁不喜

爲制藝曰焉用此庸濫之談典曰制藝文之至精者也今之習于庸濫其末失也然典所作澹古淡泊人未之好也至鳴盛論文則法古而仍不戾于時要必以經史爲根柢故及門無空疎躡等之弊其尤高者遂能博通古今著書立說皆鳴盛有以啟之也見義勇爲弟子中貧乏者盡心訓誨而不責其贄葬其外祖父母行又葬其祖母外家姚氏數棺道光十八年卒年六十

三

汪志

溫一貞字又賢號也癡諸生先世自輯里遷南潯從其姑夫沈宗騫遊由是工六法好金石收藏甚夥縣志也癡山水不輕作嘗嫌所居隘畫數十幀售之構屋兩楹疏池種竹署曰綺石居錄蘇黃兩家題跋梓以行世楊峴題宋拓族祖明推官璜殉節徽

州葬道場山麓歲久榛芴莫辨搜訪得之有圭田十餘畝為薯
 廠侵占率同族鳴于官得還其舊往來具區之瀆見詩人吳山
 秀之孫貧而瞽家有淺土十五棺遂捐資借山秀門人施國祁
 會葬因瀆村中老益勤學神明不衰卒年八十二同時陸楷字
 正之號梅圃亦宗騫弟子畫與莘開齊名項初字容初一字函
 江號藥房以善畫名縣志

劉桐字舜揮號疏雨例貢生候選州同好交遊善談藝銳志聚
 書積至十餘萬卷凡宋槧及精寫本不惜兼金羅致插架之富
 自天一閣瓶花齋而外莫之及也築眠琴山館為藏書所汪志屬
 奚鐵生寫訪書圖以寄意丁丙善本書室藏書志大江南北及浙東西知
 名好古之士或扁舟過潯上靡不題襟延接出奇書以相欣賞

嘉定少詹錢大昕許作藏書記未就而桐卒年四十五子幼山
 館之書鼠竊鯨吞不數月盡歸烏有當是時里中如楊鳳苞施
 國祁邢典張鑑范錯諸人各擅才識然皆苦貧無書大半藉桐
 所藏始得攷訂撰述施及後進流風未艾桐之功為不細云桐
 女婿温曰鑑字霽華號鐵花監生從鳳苞及典遊亦好蓄書并
 嗜金石文字精輿地之學於南北朝疆宇分合郡縣僑置攷索
 尤詳汪志

郭廷元幼為宋凌高養子凌高娶後妻生子蘊斯時廷元已稍
 長從凌高賈于貴州凌高先歸十餘載音問不通廷元居積漸
 阜乃還鄉至則門庭非昔驚問鄰里始知父卒母嫁居室已售
 他姓蘊斯鬻身法華山寺為僧矣急訪其母則母之後夫已亡

正無所依遂迎歸返其居室而居焉將訪其弟母止之曰今幸母子完聚安用弟爲廷元泣曰毋誤矣弟爲宋氏子廷元郭氏子終不能爲宋後也遂之法華時蘊斯剃髮多年其師靳之浼寺鄰爲之請以厚資贖歸卽爲蓄髮娶妻挈至貴州同賈十餘年資益豐乃析爲二兄弟各有其一後蘊斯歸奉母以終宋氏得延其祀廷元力也廷元年近五十嘉慶初卒

汪志

紀峻原名汝瑚字鐵山號石溪後改治夫府學生父守謙早卒峻纔六歲母潘氏撫之成立家貧習形家言以養母母病劇或告以割股事峻曰虧父母之遺體非禮也旣而百計罔效潛然曰舍此別有何術療我親耶乃割左股以進病遂愈弟方虎好學而多病撫視不倦妻屠氏事姑亦以孝聞母喜酒以貧命勿

進峻每私購數罌藉稱姻好所餽然後飲鄰有擔夫江某嘗醉歸叱母具茗峻斥之而飲以已茗江頓改焉讀書能窮經義明漢儒爰辰飛伏納甲諸術尤精樂律推步復善琴弈湖俗故多火葬峻勸捐富室立師善堂設杼山義塚雖里人好善而其議實峻創之道光三年水災墟墓率被淹峻乘舟往省祖塋風雨幾覆者屢不顧泊墓側兩月水退始返疴疾大劇歸五日而卒時八月十九日也年五十六方是時淺厝者盡圯棺入太湖無算峻命其子乘筏以拯之凡三百五十餘具道光十四年旌表孝子

汪志

方虎字炳章號獻谷生四歲而孤少長折節讀書與其兄其相砥礪甚友愛也乾隆丁未夭折未娶無子治夫命其次子南枝爲嗣南枝徧爲搜輯親族故老遺詩亦好學之士也

詩溪
詩徵

張鑑字春治一字荀鶴號秋水先世自喬漢遷潯鑑少從詩人計發遊弱冠補諸生館劉氏眠琴山館徧讀所藏書學益博自經史暨地理水利樂律步算六書音韻篆隸金石莫不周悉發為文章引據典確儀徵阮文達公元視浙學既而撫浙築詒經精舍于西湖拔兩浙知名士講肄其中鑑及同里楊鳳苞施國祁皆與焉佐修鹽法志經籍纂詁等書嘉慶辛酉拔貢甲子復中副榜文達督師寧波剿海寇挾鑑同行復以水災蠲賑皆資鑑贊畫今所傳兩浙賑災記即當時所編詳贍足為後法適奉
上諭預籌海運嗣因河流順軌其事遂寢鑑以河運雖安而費鉅海運雖危而費省且得其人而行之海道習熟亦未嘗不

如河道之安於是著海運芻言凡料淺占風之法定盤望星之規放洋泊舟之處靡不講明切究侍郎英和見其書稱為可用迨道光甲申冬河決高家堰漕艘路阻英和力主海運奏請允行大畧與鑑說合而稍加變通焉年近六旬膺風疾里居不出自號貞疾居士求詩文及畫者踵相接丙午選授武義教諭庚戌正月卒于官年八十三所著書凡三百餘卷汪從弟鎮字南華一字小山號荻塘阮文達督學浙江嘉慶丙辰試臨湖郡見鎮詩賦拔取入泮以是益為發憤攻讀乃得上嗽之疾庚辰逝世年未及三十也
詩溪
詩徵

范鍇初名音字聲山號白舫又號茗溪漁隱例貢生其先明祭酒應期居菁山歿後族黨散處各郡祖穎通字希賢號棲園監

生攻軒岐術精脈理自塘棲遷潯著研北居瑣錄皆載故里文獻汪志性恬淡爲善于鄉閭俗火葬忼慨捐貲不能斂者棺之不

能葬者瘞之冬夏購棉衣製藥施送貧乏又事親至孝清理墳墓修葺義莊見族人有好學者必教誨得以成立其孝友高義

足紹文正之遺風范志父宗鎬字學周號檢齋監生輯潯著二卷

錯有雋才工詩尤善詞中歲以後遠遊四方磊落好交寓意鹽

筴往來楚蜀者三十年留心掌故作潯溪紀事詩七十首徵引

記載遺聞佚事靡不畢具客蜀著蜀產吟僑寓漢上著漢口叢

談皆不愧作家晚歲寓居揚州卒年八十餘錯兄登字旣庭號

煙畦縣學生亦有文行登子來庚初名濂字小庭秀水縣學生

嘗刊南潯鎮志汪志

孫燮字呂揚號愈愚家世服賈至燮始補府學諸生旋食餼少

患足弱苦眩瞽每入闈輒病一再試遂不復赴以歲貢終旣無

意進取乃肆力於詩古文辭一編入手則家事悉置不問敦友

誼尤好接引後進其弟子多以文學雄于時有族子某貧而悍

屢調之不慊一日闖入燮室聲言將剗刃其胸燮怡然讀書不

輟某技窮而退人以氣度服之道光丙午次子斯詠鄉試捷音

至燮已病越數日卒年六十四先是里中以詩文名者推董燧

謝洲曹大斌迨燮出識者以爲突過前人云汪志

沈登瀛字金坡號柳橋府學生歸安籍祖堪自震澤遷潯父鍾

璜監生以孤童起家驟致饒裕登瀛性醇厚外和內介道光三

年大水佐有司行賑規條井井胥吏不能上下其手初勸分時

鄉人擬循舊例出錢登瀛謂今之災實甚往年循舊例奚濟於是各倍其數而登瀛則再倍之十一年歲復稔築運河石塘以工代賑登瀛董其事勾稽督察不惜勞苦兩次捐數凡五百餘緡故人金錫桂館其家病歿割屋以處其妻孥盛朝勳紀慶曾卒後卹其孤寡歲有常餼急人之急雖當匱乏必勉勉應之屢被市僧所欺不暇顧卒以是耗其家貲善讀書喜考史傳異同尤留心于鄉邦文獻謂府志訛舛因歷引史籍以識其誤復搜采南潯事實作南潯備志皆未卒業道光二十二年卒年四十九

汪志

丁桂字景顏號子香歸安學生六歲而孤為沈登瀛姊子長於登瀛家教養有成潯志孝事孀母擇友慕嚴雖酷貧取予不苟縣志

好讀書天才豪邁為文破去崖岸有長河直下之勢束以時文格律猶檻猿猱而縛虎豹於小題大艱以故屢試不售人或以為詬病或勸其稍斂以媚俗不顧也孫燮贈丁子香序卒以古文名於時卒年四十五潯志

紀慶曾字思詒號師泉又號半虔幽華詩畧晚號密庵潯志歸安學增

生孫燮紀半虔哀辭少孤育於祖母天姿警敏彊記過人雙眸炯炯每

明儕會合時笑語喧雜輒起取架上書默視俄頃已盡數卷多能背誦論古今得失儒術純疵口若懸河聞者為之色駭其為學初頗泛覽繼乃潛思理學家言沈在紀思詒事畧篤好程朱之學兼攻古文辭柳橋先生行述為詩用意深遠非淺識者所能窺曉寒樓雜憶然所長終在史而明史尤深恥為求知干譽之文遇知名士則走

避曰學與我合則往不然甯與古人相對酒酣以往書卷縱橫

歡呼自得其累頗亦由酒事家乏恆產無以為計有故人為令

山左遂往遊焉孫熒紀半處妻子時困乏又喪其次子思家而

歸行裝用盡冬月單衣嗚呼何其窮也事卒年五十一攬菴山房漫記

遺稿古文數十首日記一冊事畧師泉遺詩一卷雜

盛朝勳字介眉一字壽朋志號眉庵縣學生幽華少孤貧沈在

述山房而志趣高超胸懷浩落沈在與張年十六傭力於市肆

主人使典客烹茶火熬其手歎曰是豈為吾業耶因辭去孫熒

庵小刻苦厲學而能自拔於俗初述詞賦甚獲時譽即盡棄之

而潛心於經史沈在書唐述旁涉百家言後專治通鑑沈在紀

畧曰士不當為藻飾無用之言數年學益進境益苦而峻潔之

心堅定之守益嚴厲峭拔稜露風骨飢則閉門餓不外求人

遇同志仍忼慨論古今不稍倦書唐述謂著書不可太早故

生平讀書甚勤鈔錄前人之書甚多沈在與張卒年三十三以

暴疾不及還家殮于温氏之館汪著有唐述山房日錄二卷曉

樓雜雞肋偶存一卷汪

董蠡舟字濟甫號鑄范監生貫穿經史尤精三禮著書甚多兼

善詩畫汪不慕榮祿於書靡不窺而猶病其藏書之少閱市之

淺顏其所居之樓曰夢好棐几竹榻百城南面以寄其深愛篤

嗜之思潯溪從弟恂字謙甫號壺山府學生工詩詞能醫亦通

經學嘗疏夏小正并重修南潯鎮志汪

紀大夏初名文鳳字韓之號五樓湖府增生精研經史一時有

紀經解之目子汝霖字獻琛號半山烏程學生少承庭訓於漢
儒說經異同並能援據詳明每為學使者所拔取居家孝友父
母卒喪葬盡禮皆一人為經營不累兄弟親族有貧不能葬者
恆為叩募大戶集資葬之

曉寒樓雜憶

沈垚字敦三號子敦道光甲午優貢英姿卓犖議論常出人意
表經史子集罔不溯流探源而于三禮最深尤精輿地之學著
新疆私議謂 國家開邊萬里常患饋餉難繼省餉必須屯田
屯田必講水利某山出某水某水經某處灑灑數千言如指諸
掌中書徐松一見歎曰吾謫戍新疆凡諸水道皆所目擊然猶
歷十年之久始知曲折沈君閉戶家居獨從故紙中搜得之非
具絕大識力曷克有此為之延譽公卿間及貢入成均屢試不

售為編修徐寶善補修 大清一統志新疆數冊又為侍郎姚

元之修 國史地理志并撰道光九域志松嘗攷元史西北地

又欲注魏書地形志皆引垚為助垚友誼最篤故人盛朝勳紀

慶曾卒雖窮困常從京師寄錢卹兩家之孤其風義實今人所

罕有在京師六年鬱悒邁疾夜感噩夢夢中獨享盛饌几上祭

文六朝體甚工麗臚舉其生平學行甚悉旦而知非吉兆越十

餘日遂卒年四十三

汪志

周霈霖字佩璜號雨舫又號寄安原名恂號沁泉

周氏家譜

秉性冲淡極嗜學

閱大寅題山水遺幅

與同縣高蘆洲明經湘交湘故詩人嘗有

所作輒強和之兩人相得如昆弟霈霖善山水湘善畫蘭每當
春秋佳日兩人乘舟出城搜尋巖壑間遊人雜沓處皆不往盡

一日乃還人莫測其所至有知之者曰將以探林壑之勝繹其畫理歸而摹入尺幅中故所畫不名一家雖不多作而得之者

與湘之蘭並重許國年周雨舫傳贊湘嘗贈詩題便面其跋云先生為余

作山水卷子逋峭如黃子久蕭遠似倪雲林其清秀勁達之氣

又在顧陸張吳之外夢坡文存家故貧衣食于奔走寓吳中幾十年

今吳中人猶有稱述之者贊傳姪孫昌壽字介福號味三精繪事

尤工山水周氏家譜其於畫初無師授而摹仿前人手蹟無不逼肖

嘗取畫值為覓醉之資與里人張藹言相友善兩人皆善飲至

夕陽西下輒至酒家並酌或唱或和或聯句率以為常日本國

人得其畫極珍重之夢坡文存昌壽長子慶徵字吉雲號縵卿承家

學嫻繪事以山水得名周氏家譜

紀思曾初名經字向傳府學生官曾孫嗜酒能詩性溫厚終日

無怒容一杯入手即怡然自得家無儋石弗顧也卒年五十三

子奎光字樹門號硯香少穎異才情豪爽有聲庠序兄弟同居

終身不析筋事母能得歡心姊寡常恤其家尤樂交遊待人能

盡力赴秋試十五次卒不售以歲貢終奎光子三並有令聞長

用康初名五辰字撫于號星槎道光壬辰舉人次六箴字方李

號諫三季七襄字雲錦號西庚烏程廩生少承庭訓亦兄弟同

居家庭雍穆內外井然七襄能左書殊工整曉寒樓雜憶

沈益號秋嵐客漕督幕司箋奏四十年每歲入都見有路斃者

獨任掩埋先後三千七百餘尸一時咸稱其惠晚始得子人以

為善報縣志

周良苗字養禾號稻村周氏家譜先世本餘姚人楊葆光周味六府君暨其德配沈恭

人祖文魁字聖能周昌福始遷祖績學未仕治商出遊譚獻周氏祠堂

記以南澤風土醕樸雖素封家相率為儉約謂斯地可久居乃

家焉許國年周君聖能傳父恆字佩蘭號東橋性温厚寡交遊有獨行君

子之風譚周良苗生有至性孝於親兄弟則友形影肺腑殊瞻近

也聰明力學好讀書不競仕進篤行嗜為善於鄉里父老有利

濟事傾貲贊之無吝色譚獻稻村周君傳舉止磊落周譜績學能文朱祖

軒周媿雅冠曹偶譚輯有聽香樓尺牘未梓焜於兵周譜道光庚

子卒年四十八譚傳

丁宸字邦佐號若木歸安籍道光辛巳恩貢博學多聞自古今

沿革以及鄉邦文獻莫不言之鑿鑿後習形家言得青囊祕術

為人氣度從容內和外嚴紀奎光使酒難近惟宸能優容之奎

光亦心折宸不敢有所忤其足動人畏敬有如此曉寒樓雜憶

董邦楨號硯洲烏程學生美秀而文與紀磊温金萼交最密嘗

為金萼代償宿逋不少靳道光丁亥金萼結詠霓文社于御書

閣會者凡七人邦楨及磊與焉邦楨文思沈摯頗近歸胡風格

與時輩迥殊為馮鳴盛所稱許卒時年未三十金萼字子燧號

花卿府學生孫燧高弟也為人翩翩儒雅家故貧出遊山左後

并挈其家以去曉寒樓雜憶

李景邕字蓮塘隨兄客河南年六十始家居仁慈好施與戚友

有告貸者予以資反復開導無疾言遽色以故咸感激之及歿

有入門號泣而拜不知其姓名者兄子邦治字琴若性温厚外

和內介少從馮鳴盛遊與沈垚金錫桂吳汝雯相友善根經柅
 史力學不倦家庭之間日以修齊之要諄諄然為子弟誠晚年
 得翻胃疾閉門養病以詩酒自娛著有自怡齋吟稿四卷佚李氏
宗譜

南海志卷二十一終

南海志卷二十一

里人周慶雲纂

人物四

溫文禾 溫文銓

蔣維鏞

歸奉璋 歸嘉言 歸嘉賓

陳方毅

蔣維堃

李世榛

許旦復

吳汝雯 吳謙 吳鈞臺

董熊

金澳

沈樹楷

邵典綸 邵懷芳 紀南星

紀雲倬

徐延祺

紀南金 紀邦直 紀南枝

張炳森

錢炳熙

紀磊

顧福昌 顧壽松 顧壽朋

顧壽臧

李世佩 李世佩

蔣齋

蔣堂

汪曰楨 汪延澤

蔣維基 蔣錫綸 蔣錫紳

郁士楨 郁運申

黃鍾

張頌賢 張寶慶

溫濂

桂榮

陳煦元

梅寶楚 梅鴻吉 梅福培

梅福壩

朱兆傳 朱瑞瑩

金桐

吳文光 吳翰蜜

劉鏞 劉安瀾

談熊江

周昌福

周昌大 周昌熾 周昌富

張楨

龐雲鎔

龐正達 龐公照

朱寶書 陸壩

李庚 李世伸

李光霽

唐宗堯

錢庚

談增

李惟奎

周慶賢 周慶森

李蘭

溫文禾字允嘉號稼生歸安籍一貞孫道光丙申進士工部主
 事縣志工吟詠陸以滄冷 倜儻多才藝縣志歡場結客角酒徵歌偶
 一拈毫頃刻成文才鋒鏘鏘冷廬畫山水以大癡為宗縣志着墨
 淹潤神韻天然蔣寶齡墨以需次稽遲鬱鬱不得志益縱酒自
 放癸卯秋以疾卒於京邸年僅四十二冷廬弟文銓字金叔縣志

一字金粟烏程學生府志工書縣志性剛直好規人過往往面斥不

少貨為里黨所敬服府志咸豐十年粵匪犯南潯罵賊被戕縣志郵

贈雲騎尉世職入祀昭忠祠采訪冊

蔣維鏞原名維埔字崇如號竹坪縣志烏程人歸安籍府志幼而嗜

學工制舉文及詩賦從仁和趙慶熺游為入室弟子以國學生

援例捐納咸豐五年選授雲南路南州知州時干戈擾攘塗路

梗塞維鏞隻身就道僅挈一僕蔣錫初先伯竹屏公家傳六年抵潯縣志適回

匪滋事家傳竄擾省垣奉委督練防守府志以功加運同銜家傳八年

三月赴任九年激江回匪圍攻路南維鏞調集鄉團登陴固守

悉力堵禦賊不得逞十年七月府志賊散掠四鄉維鏞出城搜剿

為賊圍裹力戰陣亡同治中縣志滇督岑奏請議卹家傳給雲騎尉

世職府志入祀本籍昭忠祠維鏞性伉爽不設城府平居急人之

急遇不平事輒鬚髮上指其在滇時武弁多有通匪者維鏞偵

知之將密揭上官事未發而及于難家傳

歸奉璋字璞齋府庠生篤學純孝家貧授徒養親一日妻病母

出汲因溺水死奉璋晝夜號泣痛不欲生侍寢柩側甫一月竟

以哀毀卒年二十九歸氏家譜其族人嘉言字聲揚設緞肆於金陵

因家焉咸豐三年金陵陷嘉言率妻于氏子瑞年福年女一闔

門自縊殉難同嘉賓字孔昭業緞於蘇州咸豐十年蘇城陷與

妻徐氏並三歲子同縊殉難同上

陳方穀字六如號篠塘歸安學生自菱湖徙潯貧而尚義授徒

自給愛之如子貧者不取修脯坊表自飭人嚴憚之咸豐庚申

八月粵匪至潯危坐侃侃責以大義遂被戕年七十三旌卹如

例縣志

蔣維堃字次言號靜洲南潯人自號古歡閣主少工制舉文及詩賦尤善真書學褚河南筆法頗能神似屢應童子試取偁生卒不售援例以縣丞分發江蘇歷署奉賢縣縣丞常州府知事太倉州州同所至皆有政聲庚申粵匪寇湖郡奉蘇撫徐莊愨公檄解餉至湖時趙忠節公景賢督辦湖防留辦防務揮毫草檄手腕幾脫辛酉隨同趙忠節督師追賊至平望始獲大勝後遇大股賊匪維堃力戰不退誓以身殉遂投河自盡適舊僕繆劍見而拯之氣息僅屬灌以薑汁始得生以助守湖城功疊保至知府旋奉母命隨侍至上海至崇明家居數年癸亥冬適李

文忠督師至滬隨營差遣旋卽隨同克復蘇城奏保賞戴花翎嗣委辦全省軍米局務涓滴歸公一介不取會同治甲子湖城克復以先塋在長興之和平山欲親往掃墓挈一僕及四勇買舟至湖由湖至長興適沿途亂兵滋事遂及于難一僕及四勇同殉難焉事聞李文忠擬爲奏請賜卹而賢母黃恭人以旣死于亂兵之手未敢以此欺君遂止可謂深明大義矣

節錄蔣錫勳先伯靜

洲公家傳

李世榛字思周性疎略嗜酒不諳治生屢空晏如也咸豐四年客河南汝甯時粵逆猖狂世榛襄理訓字營務由例貢遞保六品軍功十年粵逆撲湖郡世榛在籍帶練勇六月十二日賊竄潯世榛巷戰力竭身被數刃越日卒

李氏宗譜

許旦復字曙卿號海嶠府志一作海橋縣志一作海樵蔣錫初海祐

村農家子縣志贅南潯沈氏後遂遷南潯歸安增生曉寒樓雜憶少工

制舉業及詩賦屢試秋闈不售乃縱情詩酒性坦易不設城府

好獎掖後進每於諧諠中寓箴規人亦樂從之游蔣傳短小精悍

奕奕有神曉寒樓雜憶家甚貧而不屑干求蔣傳讀書不名一家曉寒樓雜憶

尤熟于史事每酒酣耳熱談娓娓不倦手校之書不下千卷

蔣傳友誼最篤視人事如己事任勞任怨無自矜色縣志於故交子

弟之孤寒者必多方稱貸俾之得所蔣傳喜抄錄友朋著作曉寒樓雜憶

憶 搜羅成帙府縣志苦心愛護雖流離轉徙恒攜以自隨晚年境

益齋蔣傳兩耳重聽曉寒樓雜憶枵然破壁答紀磊書時或斷炊而鈔書不

輟府縣志年八十餘卒蔣傳

吳汝雯字半峰號種農縣志父謙字晴谷號冷餘少工舉子業晚

好吟詠往往託於酒愈醉愈醒終不以枕糟藉麩易寢饋經子

之素刑典吳晴谷傳兄鈞臺字芋園博學能文尤工詞賦采訪冊汝雯有

聲庠序試輒高列道光乙酉拔貢以世說新語為明人改削世

少善本悉心校定二十餘年博引羣書實事求是足為攷證之

資方寫定成編遽為賊燬憤悵病卒生平篤于友朋獎掖後進

從游者甚眾縣志

董熊初名如熊字岐甫號曉盦秉性冲淡周慶雲玉蘭仙館印譜跋不尙浮

薄范璣印譜序無趨炎之態葉銘再續印人傳枕經薛史不求仕進篤嗜金

石精篆刻力追秦漢正軌印譜跋每為知己作印必精心摹仿再

印人傳落墨古拙刀法渾厚分朱布白神意穆如無異於國初諸

前輩也兼善刻竹至老年猶能於摺筴鑿蠅頭小字五六行亦
精雅靡匹具見功深力到非畢生寢饋於斯者不能得其神似
又精繪事筆意若白陽復堂一流吳俊印譜序好吟詠所爲詩出於
性靈不事雕琢嘗橐筆作汗漫游所交多知名士其藝益進會
粵逆擾浙奉母播遷困憊抑塞遂得鼓疾卒於滬年四十有一

印譜跋

金澳字邃青號桐庵震澤曹村人廩貢生官鳳臺訓導夙工舉
子業刊有金邃青時文行世澳嘗遇異人授以道術能役鬼神
召風雨爲吳江令祈雨有驗里人有疾病以符治之立愈求治
者麇集告歸後遷居南潯卒子孫遂世爲潯人縣志

沈樹楷號寅媚歸安歲貢輯里人以書名兼善丹青然每自韜

晦人無知者館方丈港朱氏後去朱氏寫方丈錄別圖筆意瀟

灑曉寒樓雜憶

邵典綸與弟懷芳皆縣學生並善奕而典綸尤勝遠近無與爲
敵者惟姚某與齊名姚行十人呼姚十老然門第人品遠不如
典綸矣典綸又博洽多聞酒後談史鑑娓娓可聽同時紀南星
字壽門號秋墀亦善奕與典綸相去不遠曉寒樓雜憶

紀雲倬字象賢號菴園縣學生淳厚方古家多藏書年七十餘
猶手不釋卷間爲詩不自存稿嘗作八十自壽詩有新詩惠我
好題棺句一時和者甚眾亦足見其胸懷之曠達云曉寒樓雜憶

徐延祺字引之號芷綬生有至性八歲喪母擗踊如成人甫就
塾穎悟異常兒由是博極羣書肆力於古文學尤工詩兼嗜倚

聲道光丙申補博士弟子員家貧授徒自給咸豐壬子舉於鄉
兩上春官報罷留館京師嘗出榆關赴北平徧覽山川形勝有
所感觸發揮於詩同治壬戌考取內閣中書協辦侍讀癸亥考
取總理衙門各國事務軍機章京星夜從公矢勤矢慎每遇外
交棘手處剖陳利害盡言無隱丙寅得咯血疾由京返滬病一
月而卒年四十有七

節王文濡
徐芷綬傳

紀南金號小山峻季子能書停勻工整結構自然族人邦直號
萼園亦能書頗得董華亭筆意南金兄南枝號味琴習形家言
善琴及奕兼工吟詠居家孝友喜交游往還皆知名士晚愛梅
花又自號梅仙植梅數十株于半軒前剪裁合度暗香襲人入
其室者如入蓬壺瑤島族兄駒號味閒善畫斷簡殘編極工細

嘗為人寫扇頭人爭寶之亦工書兼篆刻又善栽菊每當花時
璀璨溢目滿圃皆馨獨攜壺酒酌花下怡然自得頗有柴桑風
致

曉寒樓
雜憶

張炳森原名鍾號醉蕉廩生保舉訓導好學敦行古道自持搜
訪婦女節烈最勤久而不倦同治中與修府志光緒初又佐修
縣志未竟而卒

縣志

錢炳熙字穎蘭歸安廩貢生烏程人咸豐七年選授湖北武昌
縣調署嘉魚縣下車伊始大難甫平伏莽未靖為設團防保甲
造礮艇晝夜梭巡四境救平時白骨蔽野為設師善堂令掩骼
埋骸至今遵守焉邑濱大江頻有水患為修葺堤埝又設保赤
局以挽溺女之風創清節堂以全窮嫠之節邑舊有忠烈堂為

重建又創設存誠局以祀鄉賢適飛蝗蔽野親自督捕蝗不爲害歲仍有秋因有蠲免舊賦之請大吏難之炳熙爭之力牘數上竟得允行士民歡聲雷動踴躍輸將遂以催科稱最保以同知用履任年餘善後事宜次第舉行而尤善于折獄有左生率其子控所聘許氏女不貞指某兩生爲證叩請離異炳熙廉得其寃而以婦女入公堂有關風化命其家人自往察驗女寃得白又有蠹吏藉弊爲姦立命斃于杖下時爲之語曰片言折獄全人節剷除蠹吏民安息誰其尸之錢父力逾年調武昌任士民焚香跪送十餘里不絕炳熙爲政大要在重學校植寒畯培民生尤能知人有僕周有全者炳熙察其才可用命納粟投効軍營以功授陝西陝安道改武職後任鄖陽鎮總兵故士林爲

炳熙所賞拔者無不掇巍科以去以積勞卒官年五十有一石

中玉錢大令傳及湖北嘉魚縣志

紀磊字位三號石齋縣志湖郡增廣生紀福壽先家貧幼學於義

塾縣志言笑不苟聰穎異常兒弱冠入郡庠卽授徒以養親時爲

小詩沈吟讀而愛之謂詩亦可成名勸勉卒業磊以吟風弄月

非儒者分內事思治一經以自見因矢志讀易事略以雜卦傳爲

主推其消息具有條理府志孳孳矻矻積三十餘年事略成書數種

縣志與漢唐宋說不相沿襲卓然成一家言持身嚴正不可干以

私而於戚族友朋間無所不用其厚金錫桂丁桂許旦復紀慶

曾之喪磊恤其孤寡藏其著述如恐不及汪曰楨方修鎮志磊

躬任采訪于故里人物搜採尤勤又以志有體裁不得人爲立

傳卽立傳亦不得過事鋪張于諸人之遺文逸事或未能盡傳因仿李氏見聞錄遺意凡戚友中足以示勸懲而資采擇者無不畢載爲曉寒樓雜憶一書鎮上文輩出代有傳人蓮漪文鈔僅存崖略因有潯上文錄潯上詩錄之輯讀易餘暇旁及堪輿之學晚年謝去館政藉以自給凡延致者無論親疏遠邇必盡心相度不欲以術自銜效流俗人所爲嘗語人曰子孫卜葬祖父所以妥親魄也若雜以富貴利達之見則不孝之罪上通于天矣且以地理精微解人難索故不著書不傳徒臨歿猶囑其子不得傳習其謹慎如此卒年七十三

事略

顧福昌字成之號春池國學生秉質仁厚有濟世利物之心

徐有

珂贈中議大夫顧君暨配朱淑人墓誌銘

幼而家貧棄儒學賈始設布肆於潯溪旋

又移設于震澤每晚必徒步歸其甘旨以供其父寒暑無間壯歲薄游滬上時值各國通商首先經理夷務一切以國家大體爲主於是向時所蓄隱念始得見諸施行里中喪葬及孤寡家無不隨時周卹繼設義塾俾族中子弟貧不能從師者無論賢愚皆有所造就咸豐辛酉冬省城陷福昌爲設粥廠于新市鎮復往來蘇關外移貲接濟以靖流離同治壬戌郡城被圍與郡人避難上海者各買米請兵救援事雖不成用心良苦上海寇至時捐開城濠以備守禦當事嘉之列諸保舉福昌力辭以爲分所當爲甲子郡城克復各處善後如捐修橋梁道路之舉潯鎮創設育嬰堂重建師善堂悉推福昌爲巨擘焉戊辰冬卒於上海旅邸年七十三居恒訓子孫以讀書爲善至疾革時猶

諄諄告戒俾毋忘先業總不外勤儉持家之意其卒也花旗國領事官命挂半旗此為外國隆禮語云忠信可行乎蠻貊信然墓誌子三長曰壽松字容齋次曰壽臧字子嘉三曰壽朋字頌三均能世其業性亦慷慨好施與樂成人之美嘗出其餘力收藏古物金石書畫靡所弗愛壽松壽臧值咸豐季年大難初夷世家右族之珍玩流轉蘇浙間所見既博所收益精其銅器之最著者壽松有子邽父獻及王宜亦作王祖尸獻故以兩獻名其齋壽臧所藏亦不亞于乃兄杭州鄒適廬壽祺為壽松編兩獻齋藏器目為壽臧編石林山房彝器文字目今器雖散佚猶得藉二目而考之壽朋耳熟能詳鑑別精而收藏亦富彼時營運失利家業中落而兄若弟評書讀畫談藝如故在塵市之中乃能風

雅若此誠不易觀也夢坡文存

李世佩字吟梅承祖業商於河南光緒丁丑汝南大飢流民日以千計世佩倡設粥廠病者藥之死者殮之救濟甚眾時疫大作染疫卒弟世傳字芝庭客河南工篆隸鐵筆間歲歸里戚友

爭索之李氏宗譜

蔣馨原名維培字寄嶽號季卿附貢生縣志候選訓導性端謹不

苟言笑蔣錫初先考奉直府君傳居家孝友尤敦氣誼所交游必擇修行力

學之士有貧者推解不吝潛心經史晨夕講肄校訂問難不憚再三丹黃未嘗少息偕其兄維基共聚書各有萬卷多精鈔舊刻聞人有秘冊必宛轉借錄儲藏日富得嚴可均所編全上古三代秦漢三國晉南北朝文謂其卷帙鯨重謄寫不易勢必終

歸湮沒爲編目錄一百三卷每篇必註明所出之書其參校各書亦並備載間有訛漏俱爲考正庶將來全書縱或缺佚後人猶可按目補輯也其于前人撰述苦心愛護如此咸豐十年避地海門憂憤病卒所著唐藩鎮考水經注碑目考未編定本已定者說文解字校勘記求是齋雜著並焜于兵燹藏書亦大半煨燼惟全文編目幸存焉

縣志

蔣堂原名維城字朝宗號海珊少應童子試不售遂援例爲員外郎候選吾鎮絲業甲于天下堂與同人創絲捐公所董其事咸豐初王壯愍公有齡來守吾湖以軍餉絀勸輸大捐檄委勸募首自倡捐應者無稍吝時有槍船藏匿匪類各挾軍器開博場演淫劇嘯聚流亡擾害閭閻堂致其酋錢榮莊於縣縣令

嚴治之以立籠站斃匪稍斂迹庚申粵匪寇湖州堂聞警至上海避焉鄉之人從賊中脫出者咸來依附甚至有素不相識者堂亦市屋居之解衣推食義聲載道同治甲子湖州克復堂遷往郡城與當道往來歷任府縣皆器重之庚午返里中向無書院堂與邑侯蕭公書首倡是舉集資興辦舊有育嬰堂久廢與邑人龐芸皋雲鏘議提絲捐以給經費不足則由諸富室助成之而自駐堂中督察全活嬰孩無算又勸鎮人集資積穀爲禦荒之策遂厚集巨款存典當生息以垂久遠他如師善堂義塾節孝祠凡屬善舉靡不贊助嘗獨建東遷之壽星橋適次孫汝曜生遂名曰壽以志慶焉生平好學字摹懷素詩做東坡皆能神似性又好客人比之孔北海晚年耽禪悅自注金剛經并

校正華嚴經音義付刊焉節蔣錫初先伯海珊公家傳

汪曰楨字剛木號謝城又號薪甫父延澤字潤之號讓庭又號酉山工詩有令名母趙棻系出名閥博通經史淬志教子曰楨得力慈訓為多故學有根柢早歲阨于小試納粟為上舍生赴秋闈者十三咸豐壬子始舉於鄉春官報罷絕意進取旋補會稽教諭砥礪名教士風歸雅在官俸入半供棗梨有荔牆叢刻十六集行世長於推步勾股之學因厯術糾紛乃上起周共和下迄明末各以當時用術步其朔閏為厯代長術五十三卷繼省為輯要十卷與所著古今推步諸術攷相為發明津逮後學復留意等韻之書補正江氏慎修四聲切韻表五卷平湖顧廣譽謂其虛心觀理故能論覈而氣平厯修南潯鎮志烏程縣志

湖州府志而鎮志體例謹嚴尤為世所傾歎曰楨又通醫理博學多能赅寇亂後上善後條程於左文襄公公奇之檄委襄辦軍務并有品端學邃識議超羣之褒乃上書力辭蓋恬退其天性也生平無妄語踐履篤實劬學汲古雖造次顛沛中文墨不廢耄而益勤光緒壬午卒於官年七十有一無嗣節夢坡文存

蔣維基字厚軒別號蟄安居士因兩鬢多髯嘗鐫小印曰蔣胡

子植品端方夢坡文存精小學工篆書填詞兼長繪事張謇嬰寄居士墓志少

好聚書與其弟維培藏書數萬卷多精本其於鄉先輩著作搜羅尤夥與汪曰楨友善延課其子姪多所造就子錫綸號桐生學有根柢詩古文辭無不擅場早歲游庠旋食餼而十度槐黃艱于一弟性固豪邁科名得失無介於懷惟日以詩酒自娛善

墨梅自號梅隱晚號梅叟每畫必系以詩嘗自寫其生平故隨
 意揮灑都成佳構得者稱爲雙絕夢坡文存錫紳字書箴號葵生別
 號嬰寧居士錫綸弟詩徵幼慧七歲能詩十一歲畢十三經負
 氣恥爲人下人以其穎異也故難以祿術恥不習發憤出藏書
 默攻之寢食爲廢壬申應童子試祿術錄第一光緒己卯舉於
 鄉屢試禮部不售由是究心經世之學入貲爲內閣中書舍人
 爲人開爽警敏篤於內行遺產悉委之昆季自負債清季弟之
 逋撫從子於孤如己出至於易簣猶拳拳焉辛丑病中風三年
 而逝年五十節張審嬰寧居士墓志

郁士楨字梓楣晚號庸翁早年從里人張秋水鑑游所作詩古
 文辭爲諸前輩所稱許旋補歸安縣學博士弟子員工書善畫

山水外尤擅墨梅書法鍾王銀鈎鐵畫亦道勁亦嫵媚人恒寶
 之生平不拘小節性伉爽遇人急需雖傾囊資助無吝色有患
 難就商者必竭力爲之排解年五十七卒於滬瀆節夢坡文存士楨
 弟運申字庚庵七齡就傅有神童之目工詩古文詞並致力於
 經世之學蜚聲庠序兩應拔萃一應考優僅獲備取優貢光緒
 戊子歲例入成均以訓導候銓生平孝友肫摯其父早世侍母
 能先意承志與諸昆弟則親愛逾恒人無間言同上
 黃鍾字鶴樓少負神童之目有聲庠序然蹇於運以明經終老
 家寒課徒自給及門甚眾性冲淡無疾言遽色暇則手一編規
 之則康熙字典或隨舉一字難之則某字下音切訓釋滔滔背
 誦若瀉瓶人服其強識案頭有見聞隨筆皆蠅頭小字都二十

餘冊求之後人乃散佚不可復得致可惜也

節夢坡文存

張頌賢字竹齋其先本貫徽州康熙間始遷南潯鎮勤於商頌賢廣穎豐頤聲若洪鐘飲食與止有常節獨居危坐竟日無怠容守慈儉踐然諾應事敏而無機心亦詼調而不觸人之隱凡廩孤餼嫗藥病樁殮食衣寒餓贍族人田千七十餘畝敦行不倦皆他富人之所難而浙之人尤喜道綱紀幹鹽之善同治初元私販充斥引滯課絀鹽法大壞巡撫召商集議頌賢連約諸商收餘姚岱山之私輕課減價以陰敵緣江并海之私於是商利益滋官課以充而家亦日以豐大光緒十八年卒年七十有六

節張謇烏程張封公墓碣

子寶慶字質甫性至孝以養志稱能逆揣父母之意所在而視無聲聽無形維持之補益之與弟定甫尤友愛

出入必偕秉庭訓振貧乏邑有義舉雖捐鉅金不吝佐理家政

心力交瘁但使吾心能稍分親之心於毫末而後始安年未三十

因得怔忡之疾遂至沈絛而不能治卒年四十三

溫濂家摩蓮學有根柢屢困棘闈以歲貢生待銓訓導

治庚午授天台下車伊始即聚生徒講論大義而以孝弟忠信

植其基先後叠主文明講席誘掖獎勵恩勤備至又恐專尚詞

華時與之搜羅典籍攷金石摹倣秦漢篆隸圖章以相期於古

雅蓋常慨然於學宮之為芻狗而欲于實心實事怡然渙然匯

儒吏政教之歸二十五年如一日忽有鄉思之感懇留不可邑

人惜其去而誌其遺思不意無疾而終於官廨

節陳汝欽天台學博摩蓮溫先

生去思碑

南漳志 卷二十一 人物四

古

桂榮字澍生號琴甫亦號勤甫郡廩生潯溪詩徵有夙慧生數月即

識字為張秋水明經高弟工詩善飲屏除聲色與人交寡言語

久而能敬紅羊之難避居他鄉與同志飲酒吟詩不改常度歸

家後以授徒為生計撫姪如子教養兼至通醫理旁及星命之

學晚年館于同里周氏之華萼樓周氏藏書甚富得博覽羣書

寒暑不釋卷潯志重修多資採訪卒年五十有六節桂林一先伯小傳

陳煦元原名熊字竹坪烏程人上海縣續志世居南潯鎮先代以業

絲起家煦元生有至性天資開敏李經芳陳公行狀我國出品以絲為

大宗而洋商來華貿絲實繁有徒煦元僑滬數十年為絲業領

袖能通譯西語而出以誠篤中西絲商倚之如長城性好施與

如郵蔭保節助衣施粥救撈覆溺掩埋暴露諸義舉無不為為

之無不力嚴廷楨光祿陳公竹坪傳雅片生膏能酖人得解救方良效求治

者暮夜風雪必赴每歲暮市魚肉餅餌饋四鄰貧戶俾祀先祖

戒毋忘本租界邏卒見乞丐輒拘禁越夕驅界外餐風宿露多

病死集同志捐建棲流所光緒辛巳川沙廳海溢釀資往振續志

稟創建新塘於八團約二十餘里明年復於九團續築新塘廣

袤如前費三萬二千數百緡保護民田五萬餘畝十四年又修

築蘇省塘橋自青浦崑山新陽而至元和境凡一百七十餘里

為橋四十七座便行旅者有如此晉粵奉直豫魯皖蘇浙各行

省先後告災時越五年集振銀二十一萬分撥災區名播海內

魯撫張豫撫倪疏煦元之曠義滂仁災黎戴德兩蒙 傳旨嘉

獎並賜心存濟物之匾額十五年四月積勞成疾尙復扶疾赴

蘇籌商振務行至中途疾重而回彌留中尙以災民爲慮行年六十九卒之日川沙農民相約詣廬拜奠不下數百人續縣志煦

元納貲官候選郎中以前辦津振敘勞加知府銜歿之明年李文忠公總督直隸會同兩江湖廣河南山東江蘇安徽各督撫聯銜具奏籲請旌卹 詔贈光祿寺卿銜並准自行建坊給予

樂善好施字樣生平事蹟列入原籍府縣志書曠典殊榮足以表彰善行昭示來禩矣狀行

梅寶楚字掌綸兄弟四人寶楚最幼娶同里金芑豐女生三子二女卽喪偶俯視遺孤尙有呱呱在抱者和淚撫蓄誓不再娶寶楚自幼佐人營繡貨業以供菽水兄玉階嫂蕭氏相繼卽世其子坤吉僅數齡寶楚飲食教誨更過所生曰吾兄只此一脈

不忍與諸兒齒也寶楚性情和易與人無片言忤卽遇極難堪者亦夷然受之居恒刻苦自勵並以勤儉勗其後人年屆百歲聰強猶昔工部侍郎徐用儀太僕寺少卿錢應溥奏請 旌表

光緒十五年五月依例令行該撫轉飭地方官給銀三十兩自行建坊卽給予昇平人瑞字樣二十八年加 恩賞給上用緞一疋銀十兩今坊建於鎮東恒字二圩節董鑾梅公掌綸家傳仲子鴻吉

字月槎入塾讀書警敏異常百歲翁家貧力不能給膏火遂廢學從姑丈張某業絲朝出暮歸謁親取親中幫廁膾身自澣洒不敢令親知也歲暮磨礮傷指血涔涔下猶茹痛勿輟其勤苦如此性孝友好施與有急難相告者視力所能及無不勉爲兵燹後本鎮各善舉諸鉅富爲之倡無役不隨其後曾無一毫吝

色子福墉光緒戊子膺鄉薦大挑知縣分發直隸鴻吉曰知縣
爲親民之官一或不慎造孽無窮博升斗以榮親吾不願汝曹
爲也福墉遂回籍以養親終同次子福培繼父志經營絲業宣
統元年南洋勸業會以所製經絲赴會比賽得頭等商勳經農
工商部奏請三品封典采訪冊

朱兆傳字溥香少孤棄舉子業治生產以絲業起家性亢爽凡
地方公益無不樂與從事南潯向有育嬰堂兵燹後歷久廢弛
乃與諸同志謀集資重興首先助地以作基礎訂規條籌款項
悉盡心力以爲之師善堂亦因兵燹後未復舊觀復集諸同志
捐資重興添築殯舍擴充籽山埋葬地凡一切經營籌備咸取
決焉先世本徽州婺源籍凡旅潯病故不得歸櫬者每年助以

資遣送十餘具以爲常同治庚午年六十三卒子瑞瑩字士玉
號蘭第邑諸生少好學受業于陸定圃徐小豁兩先生之門其
詩文散見於兩先生文集中年三十遵例捐訓導歷署江山桐
廬等縣訓導旋補縉雲縣訓導以親老乞養歸里性好施與恒
濟人之急凡公益慈善事業悉繼承先志而擴充之每年必施
衣米若干散給貧乏至各處水旱偏災必竭力資助之不稍吝
築述園吟嘯其中坐上客常滿焉年五十以鹽大使需次廣東
爲張文襄所契重補大洲場大使到任後適瘟疫盛行大洲地
濱海死亡相繼無力者不得棺殮恒以蘆蓆裹屍投諸海乃捐
資助以棺木免葬魚腹者約以千計每月兩次集士子會文課
於署中親自評閱厚給膏火以獎勵之其他義舉無不竭力提

唱士民咸感其德歲戊子某月之朔循例拈香歸觸瘴氣卒於
任年五十有七采訪分

金桐字竹庭少好讀書家貧不能具脩脯遂棄而學賈客游滬
瀆經紀有方廣取而節用薄己而厚人所獲資財壹以濟物祖
遺老屋遭粵寇之難燬于兵乃獨力重構俾族人得以聚處親
族中物故暴露者不下百餘棺悉為營葬鄉里善舉銳身堅行
或有竊金於櫝中者桐知之亟代實之終不言其人貧士艱於
應舉公捐數千金歲權子母以給賓興之費按賓興章程載義舉門綜生
平行誼仁禮存心隨事自致以化於鄉而德於人者多矣卒年

六十八節樊恭煦金公竹庭墓志銘

吳文光字臥山別號臥牛山樵潯溪詩徵先世自徽遷杭又自杭遷

湖家於烏程之南潯今已七世其先德翰蜜先生醇德劬學著
有太平閒話二卷天啟崇禎宮詞各一卷文光幼承庭誥竺學
敦行長而學賈顧雖精於廢舉而耽詩嗜酒會計之暇把盞陶
然吟詠成帙有疊夢厂詩鈔二卷不知其身在市井囂塵中也

汪曰楨鹿車借隱圖記

劉鏞字貫經舊藉上虞康熙時有諱尚賢者遷南潯湯壽潛劉通奉家傳
少學商於綿綢布肆年餘聞其師歲入僅百千則以為此不足
起家去入絲肆五年而盡通其奧又去與里人合資別設肆市
上方是時歐洲諸國開商埠於上海大購湖絲歲出口八九萬
包業是者贏獲過當不數年而業大起張謇劉公墓誌銘當同治初已
殖財數十萬號巨富湯傳既以財雄鄉里張志凡義塾書院育嬰諸

義舉皆輸巨帑以倡湯傳至於救災卹患好行其德若晉豫之旱

順直之水漢口之火淮徐海之飢南昌之築隄蘇湖之橋鎮江

之義渡凡有所告求與為見聞靡不應時立赴千里響應張方志

粵寇亂時鏞奉檄辦嚴州鹽茶由甯波逾義橋湖富陽而上入

險出險將抵建德聞鄰舟女子哭亟詢之則夫病將鬻女以市

醫藥鄰之無賴給以逃距家已一日程乃給資親送之歸光緒

己丑浙大水湖州浸尤巨窮民大謹走城市乞食籌集數萬金

僱輪船詣蕪湖兼旬得米萬石而米價頓平人心以定是役也

微鏞幾殆晚年富益不資湯傳別儲數萬金歲用其子錢購米食

餓人名曰愛米戒子孫第增毋減及歿張志歲俵愛米及千石矣

湯傳循例捐光祿寺署正後捐員外郎以海運勞績保加四品銜

光緒二十五年卒年七十四張志子安瀾字紫洄附貢生性馴謹

不為放言高論于聲色貨利之事舉不甚措意蔣錫紳工部郎中劉君墓志銘

好博涉尤好本朝人著述遂有志於綴輯檢詩家別集總集讀

之以為漁洋感舊其年篋衍僅錄師友即沈歸愚之國朝詩別

裁王德夫之國朝詩傳門庭稍稍擴大矣而詩家之所遺者正

多也乃備徵諸集創為略例自順治始迄道光止於是有國朝

詩萃之輯章棫劉紫回虞衡別傳暝鈔所寫歷有年載撰錄而外致力於

科舉文字屢應鄉舉輒不遇知於有司光緒己卯援例就郎中

職擊籤工部試京兆復被放棄乞假南歸乙酉未及入闈而病

歿於旅廬劉承幹先虞衡府君行述年二十九無嗣以弟子承幹後焉采訪冊

談熊江字任齋早歲棄學賈於江蘇之震澤鎮久之遂屬居焉

性慈惠樂善不倦凡地方義舉無鉅細無難易必盡心焉而爲之而掩埋暴露尤爲注日常將枯骸悉心分配繪成一圖至春秋時親赴荒郊見敗棺露骨心識之次日攜骨壘督工役依圖檢骸無或遺漏然後裝入骨壘數十年如一日但就所著掩埋備覽集證自序證之自光緒丁丑以至甲申八年之中共埋暴骨三萬六千可謂夥矣

節夢坡文存

周昌福字履成號詒齋又號榆齋國學生周氏家譜父寅亮字賓余恒懋遷遠出謹慎自將昌福生八歲而孤讀書無少懈尋以家貧不能久帖畢遂習業賈區上海自道光中互市以來縮轂四方要衝主客錯居縲賄鱗萃輪船招商總局握江海轉般之樞粵人徐潤筦局務最久辜權萬貨乘便逐利以高訾雄視一時

其廢著陳掾之術昌福實左右之

褚成博榆齋周公傳

後潤營業顛躓債

家責償勢汹汹昌福爲司會計開誠布公悉泯詐虞積負漸理檢點契券居間無昌福名曰荒僻之地墳墓纍纍我不忍得居間之錢以擾及白骨也光緒十五年謝事家居會同里張鴻順以浙西鹽筴需才佐理強之出昌福爲抉剔叢弊盡瘁數年精力漸減告歸養痾旋卒於家年七十有三

家庭瑣語

昌福宅心仁慈

樂善不倦凡孤寡窮民四方災沴必輸財賙卹或展轉募資以濟里中善堂舊用甌甑瘞暴骸覆以瓦缶日久易致飄露昌福以意創爲牡蓋合合處鉏鋤相銜復以白灰坊其隙永無薛暴之患其外爲方圓揭藥以辨男女撰圖說詳著其法冀他人推廣行之嘗覽坐花誌果一書喜其紀述詳雅有資勸懲偕同志

詳為音釋鏤版行世得其書者頗受啟發之益云褚傳

周昌大字爾耆號味詩生有異稟少就外傳讀即解學倍常兒

魯寶清味詩周公傳稍長動必以禮譚獻許太夫人傳年十五遭父喪魯傳於是輟

讀從巨商往來譚傳盡心經營楊葆光董宜人傳家業漸起鄭傳笈董性

伉直任事有條理見義勇為周譜居恒走鄉里揜骼埋胔補邑中

善堂所未及魯傳郵糈惜字默行不劫人往往不知其名助戚屬

婚喪有謝者輒匿避譚傳弟昌熾字經腴號味六周譜生而岐嶷楊葆

光周味六府君暨其德配沈蒸人傳讀書推暨義理不事華藻性謙篤從諸兄後

退然不欲勝人未弱冠從賈于滬上譚傳善於億中候時轉物雖

遇時艱未嘗困乏輒以羨餘廣行善事倡設新塍育嬰堂以挽

溺女之俗閔行救生局以濟覆舟之險然不自以為功流陽振

荒昌熾實先倡捐則推之錢塘施善昌太湖救生局亂後久廢

昌熾議出洋絲筋千兩以下量施如干有司著為令勒石頌德

則推之太湖金恩綬二十年中東南捐振義漿仁粟每歲絡繹

昌熾皆先之嘗客石門姚氏自姚氏中落昌熾貸以白金五千

及病亟召姚氏子與訣而焚其券楊傳光緒八年與從兄昌福弟

昌富昌熾祠堂記合力建宗祠於墨溪昌熾又購腴田五百畝以為

祭費且贍族焉楊傳湖絲為物產大宗道光時運銷海外初無搖

絲為經者同治季年昌熾始令震澤雙楊鎮人之業蘇經者仿

東洋經製成銷于西人各商競效為之迄今風行昌熾歿雙楊

搖經人感其開通風氣衣食所資子孫利賴因別營一龕奉昌

熾栗主而祀之采訪冊季弟昌富字鶴峯號芸齋天資敏慧能詩

善書生平仗義輕財地方善舉或倡或因無不勇為樂與名士
 交游收藏甚富嘗自闢一園藏吳江徐山民紫籐花館石刻及
 摹刻嚴鐵橋臨瑯琊臺碑顏其亭曰友石自為記勒石嵌之壁
 間晚年園歸他主石亦贈人所得金石書畫書籍以漸散佚不
 無有盛衰之感也

周慶雲叔父
芸齋公小傳

張楨字紹濂號少蘭沈默寡言讀書得閒長於詞章之學父醇
 字蘭言善繪事性瀟灑嗜酒而不亂作詩不假思索信口拈成
 無不雋妙少蘭承家學極刻厲咸豐辛酉拔貢同治丁卯順天
 鄉試舉人光緒丁丑成進士授編修所交皆通彥無熱中客雖
 留館數年未得試差恒鬱鬱旋卒著述散佚並詩稿亦無徵焉

夢坡
文存

龐雲鎔字芸皋幼讀書警悟異常童年十五習絲業精究利病
 父聽泉幕游湘中母卒哀毀骨立服除父為授室出篋中金二
 百使營生計咸豐十一年粵匪寇湖州陷南潯避之上海數月
 父歿持喪不出操舊業視市盈虛與為進退獲利倍蓰數年舍
 去挾資歸里買田宅闢宗祠置祀產建義莊蔚然為望族南潯
 俗好溺女倡立育嬰堂輸巨資躬為董事全活無算

鄭孝胥龐
公墓表

又以杭城育嬰堂屋狹人多夏間易染時疫出巨款購鄰地廣
 建號舍疾疹不生嬰孩賴以保全者甚眾撫憲劉公秉璋給保
 赤同仁匾額以彰善行

丁丙樂
善錄

又立湖郡棲流所修鎮市橋梁
 及杭州下河塘隄拱宸橋工直隸河南災籌振款數累巨萬大
 府奏聞傳 旨嘉獎晚游蘇州見清節堂規制而善之立倣行

于湖州未竟而疾革年五十七歲

墓表

龐正達字吉士號橘士歸安歲貢生

溇溪詩徵

父公照字襄雲號楚

漁道光丁未進士湖南會同知縣解組歸來里中義舉咸與籌

商如育嬰如書院尤其犖犖大者書院落成即聘為掌教士風

一振當宦湘時正達侍焉

采訪冊

湘中人文淵藪天下稱最正達

躋衡嶽涉洞庭接之目者發之言又以屢躡場屋不得志于有

司乃盡洩胸中鬱勃之氣託之於詩儻所謂窮而益工者與

龐序

有養拙齋詩存

詩徵

朱寶書字稷生號稼軒少負文名磊落不拘庚申避兵滬瀆作

海角圖以寄意時流題詠甚夥亂定還鄉住樂酣壩同治癸酉

拔貢並舉於鄉次年成進士分發福建乙亥恩科福建鄉試

同考官得士稱盛歷任甯德建寧知縣所至皆有政聲旋即解

組曰知足不辱曷歸乎來寶書本文肅公後裔即就相國之墨

溪舊宅建屋三楹優游歲月宦囊無多絕不預聞外事邑人高

之同時有陸墉字小園亦需次閩省由佐貳起家曾署甯德縣

卸任返里里之人欽其誠篤公推絲業董事終其天年

夢坡文存

李庚原名世保字佑之號芋卿晚號餘慶亦號贅疣老人

溇溪詩徵

早歲應童子試不售棄儒服賈客河南不得志乃游心藝事中

歲厲滬瀆著歇浦棹歌

李氏宗譜

傳誦一時越二十年倦游歸里屏

棄塵事日以詩酒自娛又以平生所好如醫卜風鑑之屬嘗行

其術於鄉求者罔弗應善畫蘆雁以生動之筆而寫蕭疏之致

寄興悠遠且必賸以詩歌得者珍為雙璧壽七十有一

節夢坡文存

弟世伸字子兼號志宣晚號屈翁詩徵家貧力學能自立不事

舉子業喜吟詠徐世勳西塞山房詩選序自稱西塞山樵中歲遊楚豫抑鬱

不得志晚客雲陽益縱情詩酒與徐世勳聞人福圻韓卿雲相

唱和著屈翁吟稿十二卷堅匏錄四卷李氏宗譜

李光霽字雅深晚號遐翁吳齊治李府君行略生而岐嶷有至性年十一

父病侍湯藥未嘗廢離居父喪哀毀若成人母孝年逾六十

孺慕不衰遭粵匪難與兄廷賡同被掠越二月以智脫歸亂後

補弟子員李氏宗譜與兄均課讀為業風雨遘廬手一卷不釋經史

百家靡不淹貫下筆洋洋數千言立就性嚴厲人有過面斥不

稍貸鄉子弟賢者敬愛不肖者畏憚脫有疵行每相戒勿使知

略工詩文善草書著有劫餘雜識下士芻言延桂廬詩存藏於

家譜

唐宗堯字賓穆諸生植品端重好學不倦性又沉默所造益精

喜臨池摹唐圭峯碑頗得神似嘗發起開農會集資以拯農民

之困乏者又與蔣錫紳周慶賢等創設洗心局以懲子弟之游

惰者胞與為懷人咸欽敬晚館張氏兩楓居忽櫻目疾以過投

寒涼之劑元氣大戕馴至不祿惜哉采訪冊

錢庚原名開一字琢初幼穎異工篆隸尤善鐵筆上規秦漢刀

法謹嚴見上虞徐辛穀三庚印痕於丁蔣奚黃外別開生面遂

執贄門下悉心摹倣卒為辛穀入室高弟有近許齋印譜近許

者以篆體宗說文而不泥於說文也德清俞樾為之序夢坡庚文存

性豪邁而喜飲與郡人王樹蔭友善樹蔭以道員需次安徽江

右庚爲入幕之賓酌酒談藝相得甚歡卒以酒喪其軀年五十餘

采訪冊

談增字梅軒少習絲業喜涉獵經史後獲同里紀石齋磊遺書研究易理遂悟堪輿之學嘗服務師善堂凡掩骼埋骹之事歲歲下鄉助理因得留心古墓測其來龍去脈及氣運之衰旺默識于胸閱年既久遂出而問世人邀之相地往往徒步以從不索重酬貧乏者不取值故里人之求地者益眾而停葬之風因之稍殺性嗜酒而麤豪喜詼諧而無城府任事有始終人樂就

焉年五十七而卒

夢坡文存

李惟奎字慕蘇號聯僊生有至性聰穎殊常兒年十七籍於學弱冠丁父艱哀毀柴立旋得痿痺之疾艱於步履於是擯影一

室徧讀所藏書學益博病亦漸瘳不數年翹然見推士類矣母氏張以疾淹牀蓐惟奎悉心奉侍母卧時脫屣登樓不使有聲息歷十年如一日有同懷兄二人長者殤次惟階盛年忽失明且病瘖惟奎乃大戚若己致也者療之久不效自以不諳方伎爲恨求愈兄疾之心積十四年而不懈親朋聚首輒述其兄所苦憂思溢於言表嗣得西醫割治之其目愈又數年其瘖亦痊惟奎少時欲以科名榮親旣失怙兄又遭疾家政總於一人不能遠遊遂絕意進取而爲外家董理浙西鹽業當積疲之後銳意整飭數年而事大理里人咸服其才敏每以公事推之戊戌庚子間內外交訂育才孔亟以私財創明理學塾爲一邑倡於是潯溪公學正蒙小學接踵興辦潯故濱湖多盜患又創議設

國防以邊其萌迄於今不廢自餘義舉無不踴躍為之性好交遊重然諾故人樂就之每於暇日約知己數輩嘯聚一室弈棋賦詩以為娛樂平生豪於飲然不及於亂體故羸弱憂勞過人病中喪母竟以毀卒年四十有一

夢坡文存

周慶賢字普生號芹軒又號羣仙亦號琴軒昌大子周氏家譜植學深厚年十六補弟子員二十二餼上庠登光緒壬午鄉榜益浸溢於典墳肆力於詩古文辭藏書數千卷丹鉛徧焉攻經學不分門戶以為漢宋學說可互證而不可互廢錄先賢經解千餘篇務存恢博丙申入南學考取覺羅官學教習六踏槐棘僅挑膽錄遂絕意制科往來西湖虞山間探名勝每素月橫空花香滿室輒撫琴自娛人或強其勾撥曰祇可自怡悅不堪持贈君

也旋以史館敘膳錄勞得知縣筮仕江蘇廉靜寡營利祿不能

淫壬寅補行庚辛

恩正科

朱祖謀琴軒周君傳

充江南鄉試同考官所

得皆知名士

周譜

輿論翕然辦理常昭沙洲清糧事宜躬臨海澨

區畫精詳以世變日亟研究今世所謂法政者常若不及試以

事叢雜立辦

朱傳

蘇撫陸元鼎頗倚重焉

周譜

弟慶森字郁文號蓉

史又號榮史別號占城冬至生

周譜

幼而聰穎嶷然如成人為文

辭操筆立就

朱中樹榮史周公墓誌銘

詩學梅村得其神髓

周延年榮史公行狀

累試

不得第遂援例以校官用年四十餘始授温州平陽縣學篆激

拔英俊多所造就暇則以山水自娛澹如也

墓誌

平俗親死不葬

率皆棄棺山麓慶森遊雁蕩見而憫之乃捐資募助建義冢於

雁山之奇石亭邑中天花盛行嬰孩死者無算慶森創施種牛

痘局於城中以拯民之貧不克就醫者在任四年

行乞假歸里

里中有公益事度力所及無不與時望歸之
李蘭字農如別號稻香外史善鐵筆精繪事尤工花卉秀逸多
奇氣顧未嘗妄為人畫人亦不能強家故貧性又孤介落魄無
以自給不得已始稍稍出其畫示人常儻居古刹中簞食瓢飲
蕭然自得時或握管凝思往往有所心會於是所詣益精然貧
乏益甚某歲除夕索債者畢至倉卒無以應探囊出琴曰客憊
矣家貧無長物願鼓琴為客娛因奏琴曲終人亦去矣晚年益
縱情山水薄遊虞山日醉壚下主人憐其蹭蹬遇之至殷乃寓
其家可一載主人未嘗索值蘭亦不言謝也逾時出一幀授主
人圖雀凡百殊其狀蓋生平絕作也蘭能文詩亦清麗可誦惜

不自珍愛所傳誦者零章斷句而已

節蔡瑩書李農如事略

南溟志卷二十一終

南潯志卷二十一

里人周慶雲纂

寓賢

元 潘公穎

明 范麟

李樂

周虞卿 沈選 龔元成

孫滄

沈皇玉

張雋 張道岸

清 周篆

茅星來

潘爾夔

黃周星

申用嘉

余津

袁袞

范璨

凌樹屏

吳山秀

金錫桂

周性

王國閻

張澹

吳鳴鏘

吳光熊

謝品

元

潘公穎一作公隱越人元末明初隱居潯南蜀人虞堪叔勝流寓吳

下恆往來茗上與公穎交頗密集中屢有贈詩見虞山人詩集

明

范麟字國瑞號桂巖恩貢授儒學教諭成化間徵召賜六品官

辭由秀水遷于潯西即今所稱范村橋卒葬禾城范志

袁表字永之號胥臺長洲人嘉靖丙戌進士選庶吉士汪志改刑

部主事調兵部坐失火下詔獄明詩編成湖州過潯上題詩于

御書閣壁間嘗寓法華庵會赦歸以薦起補南京武選主事歷

職方員外郎出為廣西提學僉事謝病歸年僅四十六而卒所

著皇明獻寶四十卷吳中先賢傳十卷世緯二十篇論世緯一

卷世系八述修省集一卷歲時記一卷胥臺集二十卷汪志

李樂字彥和號臨川桐鄉人寄籍烏程館董氏和雲樓讀書拜

三莊給事董道醇其高弟也隆慶戊辰進士知新淦縣簡約坦

易民愛戴如父母擢禮科給事中改吏科忤張居正出為福建

僉事歷江西廣西參議所至潔已愛民而懲墨吏不少貸告病

歸起尚寶卿不赴著見聞雜記於風土人心升降之際三致意

焉又著金川紀事烏青志拳勺園小刻年八十七卒祀鄉賢汪志

余津字濟之其先餘姚人徙海鹽至津徙潯南性穎敏一目輒

成誦不肯為舉子業專為歌詩皆亮節逸響不事生產家故貧

然晏如也所作潯溪漁唱膾炙人口後居吳江縱酒卒汪志

周虞卿一作奚卿失其名燕京人寓居潯之西莊村工書善弈薦紳

皆愛重之以韋布相對夷然也翫髒任俠好論天下事所料悉

奇中時脫人于險不令人知友人宋珏為刻其詩百餘篇卒年

七十餘無子有九女其壻若沈選精于弈龔元成工于書皆得

其一體選字仲升崇禎庚午舉人石門縣教諭自杭州遷潯汪志

申用嘉字美中吳縣人文定公時行仲子為董給諫館甥寓居

於潯由湖庠中浙闈萬歷壬子舉人歷官廣西參政范志

孫澹字長源號孟樸吳江吳淞人嘉興府學生少負才名張溥

楊廷樞張采朱隗諸人倡舉應社澹為效奔走以襄厥事造一

舟顏曰渡青乘之周遊江浙一時有孫鋪司之目稍大之為廣

應社至崇禎初年澹又與吳勳吳允夏沈應瑞等肇舉復社於

時雲間有幾社浙西有聞社江北有南社江西有則社又有歷

亭席社崑陽雲簪社而吳門別有羽朋社匡社武林有讀書社

山左有大社僉會于吳統合于復社始于戊辰成于己巳其盟

書曰學不殖將落毋蹈匪彝毋讀非聖書毋違老成人毋矜厥

長毋以辯言亂政毋干進喪乃身嗣今以往犯者小用諫大者

擯僉曰諾是役也澹渡淮泗歷齊魯以達于京師賢大夫士必

審擇而定襟契然後進之于社故溥之言曰忘其身唯取友是

審擇而定襟契然後進之于社故溥之言曰忘其身唯取友是

急義不辭難而千里必應三年之間若無孟樸則其道幾廢蓋先後大會者三復社之名動朝野滄勞居多然而斂怨深矣十年正月蘇州民陸文聲疏陳風俗之弊皆原于士子倡立復社以亂天下蘇州推官周之夔復許奏溥等樹黨挾持至徐懷丹之草檄并聲十罪以致討中有云或呼學究智囊或號行舟太保傳檄則星馳電發宴會則酒池肉林所謂行舟傳檄皆指溥言之迨社禍既解社集亦輟年已老家又中落乃築梅縮居于潯爲別業常寓居焉以詩自娛順治三年卒有蘅草及梅縮居存草初集二集湖上聯句集賴潯溪董氏藏之得存此亦交遊之力也

汪志

黃周星字九煙號圃庵上元籍廣東人幼撫于楚湘周氏名星

繫楚籍入成均崇禎癸酉舉北畿賢書南還泊金陵遇本生父母庚辰成進士終周氏父母喪經理弟妹婚嫁畢謁選戶部主事乃具疏復姓歸宗國變高隱不仕變名曰黃人字曰略似號半非擬作將就二園稱將就主人又曰汰沃主人又曰笑蒼道人布衣素冠寒暑不易流寓長興五遷而至南潯之墨溪賣文自給工篆隸求者如市性耿介處交遊間語言不少假借喜施與雖簞瓢屢空遇當阨者必多方濟之家益貧落康熙庚申春年七十忽感愴傷心仰天歎曰嘻而今不可以死乎爲解蛻吟十章自撰墓誌與妻孥訣忼慨命酒盡數斗大醉次日漫書謝疊山宋室忠臣止欠一死吾今不死復何待家人時護持之五月五日賦絕命詞數章遂投聞潯橋下賴救以免繼又赴水越

數日傷病死葬于潯世所稱獨樹墳是已著有唐詩快分驚天
泣鬼移人三集凡三十卷自編圍庵詩文芻狗齋集夏為堂集
山曉閣詩集千家姓編庾詞筭箋復姓紀事夏為堂別集詞餘
唐宋八大家文備益蒙集又有夢史佚不傳子楠字禹弓奉其
母返金陵汪志

沈皇玉字玉汝吳江之震澤鎮人性孝友任俠嘗殲巨盜以雪
父恥與人交伉直無所隱早歲補諸生與於復社晚年寓潯之
墨溪與張雋閔聲張道岸稱石交著金剛心經二解鱸鄉詩文
集潯溪稿康熙丁未鄞人萬言至潯上與定交為作七十壽序
臚舉生平學行甚詳汪志

潘爾夔字友龍吳江之北麻人諸生時遊曹村過潯上愛其風

士崇禎癸未遂寓居于潯習稔舊聞因成潯溪文獻四卷爾夔
忼慨有風致能文工書莊允城慕之列其名于明書簡端偶與
允城有財帛交以致詬削其名得不罹禍鎮之有志自爾夔始
是後夏光遠陳可升莊學德張鴻鶴方熊方燾董肇鏗屢次增
訂彙為一編爾夔原本遂不復可識別矣又著涉江草汪志

張雋字非仲一字文通蘇州諸生于經史百家無不得其旨趣
所與遊皆名彥樓居積書甚富手錄千餘卷擁列左右已則坐
臥其中摺龕筆記嘗綜括帝堯以來至明代事蹟為三部畧數百卷
表弟董二酉字誦孫同居吳淞從雋講濂洛之學王豫江蘇詩徵董說
豐草庵集有聞非翁卜居潯上之作蠅鬚館詩話後為莊氏所招作
有明理學諸人傳其稿另錄出名曰與斯集禍未發時已知其

非逃于僧舍年已七十餘就逮時談笑自若與潘吳諸人同死

榴龕筆記同時聞人有張道岸字懸渡一字間度號間鶴一號南村

雙林鎮志性嗜酒少進輒醉醉即喜畫蘭勃勃有生氣陸子黃嘗得

所畫懸之素壁忽發香滿室中因額其處曰蘭堂府志董漢策館

道岸於夕佳樓汪志為茗溪四隱之一雙林鎮志慶雲按沈登

賢汪志以其居潯不久削之不錄然考舊刻本同岑集第七卷

署名潯水張道岸參道岸自署潯水其為久居於潯可知又削

張雋凌樹屏亦見備志范麟申用嘉早見范志雖偶爾託足未

嘗久居而其人皆舊志所已有今亦列入徵之前例蓋猶汪志

李樂也

清 周篆字籀書號草亭先世居青浦父澧字禹功號天頑避亂來

潯生篆年十七遷居松江華亭後復遷吳江之嚴墓穎敏好學

能為詩古文弱冠後問道於顧炎武炎武以務本語之遂博究

經史所作多關治體徧遊九州參文武幕府於所在河渠兵農

錢穀之事益加諳練發為詞章皆切中當時利弊而律度嚴密

卓然成家年六十五歸里卒著有蜀漢書杜詩集說草亭詩文

集等書汪志

茅星來字豈宿號鈍叟又號具茨山人歸安之花林人明河南

按察副使坤之後年近三十為諸生屢絀於有司乃專攻經史

欲以著述自見以朱子近思錄舊注未詳密遂為之集注行止

坐臥皆不輟歷二十餘年書成所著古文於國維民瘼反覆致

意足為後世勸懲少時嘗客授于潯南烏鎮徐氏潯北橋下張

氏故常往來于潯後遂僑居潯之西交界壩橋與董氏世有連

晚年時相過從以暴疾卒于董氏豐草庵年七十無子

汪志

范璨字電文號約軒晚號松巖榜姓姚秀水人康熙癸巳恩

科舉人雍正甲辰進士入詞館以人才薦知大興縣縣故有隱

糧一案璨關白府尹發之布政使某不悅方以他事揭璨在

廷有白璨枉者特擢河南鄧州知州旁邑巨盜張連膂力絕

人吏不敢捕璨召瞽目退役某以計擒之再擢分巡廬鳳潁道

廬鳳境有飛蝗璨禱于神率吏民捕之忽有蟲似蝗而黑雜處

蝗中三日齧蝗爲盡陞直隸布政使授湖北巡撫移安徽或挾

千金追送江干不受且慮儻從爲奸自坐鷓首視其舟去遠乃

已入爲副都御史遷工部右侍郎奏弛富戶囤積之禁曰部議

青黃不接之時米價昂貴地方有司應諄切勸諭蓋藏充裕之

家令其酌留食用外陸續糶賣以濟民食請 敕下直省督撫

轉飭地方官先行出示曉諭務使恪遵禁令陸續糶賣以平市

價如有積米數多閉糶妨民者酌量勒令出糶臣思儉歲歉收

青黃不接市價騰湧待哺嗷嗷地方有司自應勸諭富戶陸續

糶賣以濟民食而平市價但大張告示勒令出糶保無姦頑之

輩聲言 朝廷之惠愛窮民若此煽惑良善糾黨成眾或踵門

凌辱或逞毆行凶或本屬小康而妄稱巨戶或稍留食用而指

有餘藏或勾通地方總甲而私相勒詐或朋比衙門胥吏而裝

點捏呈其尤甚者本其挾制之有因肆其搶奪之惡習是良善

貧民未受其利而富民已大被其毒臣以爲宜用密札令地方

官密勸富戶敦睦鄉里如數百石之家令其自家門首零星出

糶親自經理倘盈千累萬之戶令其附近村落分設糶局亦須零星出糶親自經理務使本地買食窮民得沾實惠如有樂于行善情願減糶者州縣官核其所糶若干所減若干酌其多寡量爲嘉獎或賚花紅或給匾額行善者多或統作一碑誌以爲鄉黨勸則貧者旣無挾制之緣而富者自多樂善之舉矣 上是其請部議准行之時乾隆九年十二月也又奏酌命盜處分之條核下江收漕之制並有裨于時政旋以葬親乞歸移家潯上居東柵大街所傳九老第是也復構樂志堂于皇御河西恭奉 御書松巖樂志扁額後以 南巡迎 駕屢蒙 優渥列于九老年八十七卒于丙戌 賜祭葬著有樂志堂集露涓篇

汪志

凌樹屏字保釐晟舍人幼卽穎異里中方輿道古社時藝之外兼及詩古文詞年十五從其父後擬作梅花賦輒驚其前輩旋補邑廩生樹屏爲吾潯陸氏之自出嘗課徒於陸之是亦山房陸士涓董南谷皆奇其才樹屏亦以前輩事之不衰雍正末開博學鴻詞科縣令將以名上郡守少其齒罷之乾隆元年舉於鄉四年成進士選陝西咸陽知縣尋改嘉興府教授以終著有瓠息齋前集二十四卷後集若干卷其寓潯時所作爲疥壁集沈登瀛南潯備志擬稿

吳山秀字人虬號晚青震澤歲貢生居湖濱因瀆村晚以貧故授經于潯始遷北鄉之姚田繼徙北姚家匯其教人時藝之外兼攻詩古文辭旁及六法繪事學者各得其所近施國祁邢典

溫一貞皆其高弟也著小梅花庵文集十二卷詩集六卷編年分錄集名甚多又著頤神齋題畫詩齋志而卒有孫遊幕于外老而歸目已雙瞽數年亦卒竟無後

汪志

金錫桂字伯辛號一山又號山甫震澤縣學廩生曹村人工四六及古文尤工詩敏才健筆千言輒就不煩繩削亦不耐苦思也不善生計授徒溇上十餘年窶困日甚道光甲午春將為遠遊不果時沈登瀛於屋後營精舍徙藏書于其中榜曰兌庵為講誦之所手纂鄉先輩詩文援錫桂為助四月朔始來踰月而病病七日竟卒年五十登瀛為營殯殮即割兌庵居其妻子并謀及同人歲贖錢以給其衣食焉錫桂所著明史雜詠四卷溪雲閣詩十二卷文三卷詩餘一卷友人孫燮嘗選其詩百餘首

范鍇與錫桂初未相識讀而愛之為刊諸漢口

汪志

周性字贊天號蘭園

汪志 按紀磊曉寒樓雜憶作諱姓字贊夫謫

國學生錢塘人寓

溇南質庫司會計事嘉慶丁卯秋倡捐設義塾於廣惠宮延師訓寒微子弟以二十四人為限每朔望肅衣冠至塾謁先師恭讀聖諭廣訓一章覈功課以示懲勸始終如一不厭不倦性仁愛雖昆蟲草木不忍傷家不甚裕人有求者無不應也後以病謝事去未幾卒於家訃至雖販夫牧豎莫不歎息泣下義塾之設前後凡八年卒後義塾遂廢

紀磊曉寒樓雜憶

王國閻字際輝號醒夫先世自徽州遷廣德再遷湖州幼明敏父建初篤愛之甫成童就試遭父艱毀瘠逾禮貧不克卒學與兄松舟賈于南溇友愛甚至有贏餘輒寄家以為繼母甘旨客

久始占籍烏程家雖貧遇事必舉尤能濟物南潯師善堂掩骸
長生會施構及恤孤寡議捐振賙人之急靡不曲至嘉慶二十
三年宗祠圯與兄倡首得千金祠宇復完道光九年輯家乘凡
造莊寘產立碣無不身任桐水王氏之得復振國閭之力居多
也節錄張鑑
王君家傳

張澹字耕雲一字更云號春水吳江盛澤人潯溪詩徵嘗寓居潯之

東總管堂采訪冊登臨風景四時皆宜曰昔人有言一片野心已

被白雲留住予固出岫之雲而不能作霖雨豈其有野心乎遂

顏之曰留雲閣沈登瀛留雲閣圖記澹幼孤力學寒暑不輟雖篷窗客邸

吟哦自若嗜畫入骨得同志錢志偉指授中年橐筆遊武林一

時才俊傾襟攬佩唱酬無間盛湖志文苑傳其寓潯時張鑑沈登瀛董

蠡舟汪曰楨陸長春輩皆與訂交潯溪詩徵鑑為繪留雲閣圖登瀛

為之記采訪冊

吳鳴鏞字鑄生吳江縣歲貢生工詩善書嘉慶戊子己丑歲寓

南潯東藏寺顏所居曰麋月閣課徒自給與溫一貞張鑑友善

采訪冊

吳光熊字吉庭縣學生湖濱喬灣人寓居南柵工畫葡萄墨分

五色時繪松鼠栩栩欲活研究醫理內外科均有心得行道來

鎮兼課生徒家故貧而怡然自得晚年就上海蜚英書局校勘

之席未幾卒於潯有子三仲與叔均早世其長賈于市不知所

終夢坡
文存

謝品字芝青上虞人瀏河甘草司巡檢罷官後寓南潯為人司

質庫好吟詠有才能任事果敏里中義舉常相助為理居三十餘年卒于溟有春池草堂詩文瀏湄唱和集

采訪冊

南溟志卷二十二終

南溟志卷二十三

里人周慶雲纂

方外

宋法照

宗偉

元普應

祿宏

明淨戒

行恣

清願如 湘潭

大全

淨孝 秉遠

靈璧 超一

懸證

蔭在 戒石 明鑑

宗嚴 浣塵

秉融 學讓 達塵

達曾 悟詮 證淳

崔和尚

慧澄

慧性 已上僧

周科耀 毛樸庵 閔九陽

沈澄初 已上道士

智緣 尼

宋

法照字悟心崇德人紹興間興建祇園寺 汪志

宗偉永嘉人開禧間學道尋師至南林愛其風土結草庵居焉

嘗血指書報身佛所說經口不絕誦興建報國寺 汪志

元

普應國師證道之後因欲避世多好船中居至大己酉泊儀真

辛亥泊吳江延祐泊南潯故詠船居者頗多而廣錄中所載者

僅一二耳 宋濂跋德禪師船居詩後

明

淨戒俗姓王字定巖號幻居南柵人身居桑門心存孝道出家

於種福院後遊諸方參禮名師天竺虎跑靈谷諸寺皆有遺跡

官至左覺義左講經受勅為慧濟禪師無疾而寂茶毘時有五

色雲如蓋又有四鶴來飛弟子宗夔奉其不燼之齒牙數珠葬

于道場山之太師塢有語錄行于世 汪志

秣宏字佛慧號蓮池仁和沈氏子初為博士弟子棄而事佛從

蜀師剃度受具遊方住吾潯豆腐橋廢寺中苦行三年無知者

由潯至雲棲 汪志見山水幽寂遂有終焉之志結茆三楹倚壁危

坐環山多虎患師發悲懇諷經施食虎遂遠徙歲大旱擊木魚

循田念佛兩隨足跡而至居民德之遂成蘭若道風大扇四眾

歛集首倡毘尼以立基本單提念佛以攝禪淨人稱雲棲菩薩

列朝詩集住山三十餘年別眾示寂 國朝雍正十二年 敕封淨

妙真修禪師汪志

行恣字口擇號復元湖州人少出紫柏大師真可之門而不相

下居於南潯工詩朱國禎董斯張並與結方外社斯張稱其口

不談貴介筆不流凡近為刻其詩以傳汪志馮開之序且止庵詩

集謂恣公詩清真孤迥如倪元鎮畫遠水疎林孤亭片石絕無

酸餽氣采訪冊

清

願如或云名慧裔字南林報國寺沙彌寺久廢斷一臂誓還舊

觀董斯張為作緣起後鬱成樓閣南林者寺古名其為字所以

誓也順治中年六十餘尚健理院事康熙初卒雍正時有湘潭

者失其名復斷一手倡募重修報國寺汪志

大全字雲浪姓趙氏改姓薛年十四觀雲棲遺像決志出家寓

皋亭龍居苦心參究見松針墜地廓然有省初住嘉興之碧雲

後住湖州之東藏性落拓不事威儀見解既高於世無染素直

言或偶談人過不知者皆怪之順治己亥之冬為蜚語所中擠

狴犴端坐微笑而逝年五十八汪志

淨孝字此山姓周氏名廖字澹城吳縣諸生按張雋和此翁秋

自注姓廖號澹城攷雋作歲交詩序此翁以孝動天子兩節母

死生得喪揚未幾天地崩圻寄命戈鋌云云據蘇州府志吳縣

周重仁妻王氏嗣子士元妻陸氏姑節婦孝並於崇禎少孤事

母以孝聞鼎革時逃于禪爲漁庵禪師明聞法嗣從董漢策募
長生寺旁地爲明聞造骨塔創建塔院黃周星爲題歲寒堂額
能詩善畫梅與南潛友善著歲交詩自譜其流連廢興之迹又
著枯木吟中有建院鑄像營塔鑿池諸詩卽記創院事也後有
秉遠字覺先晚自號幻空本吳江陸氏子住持長生寺所著詩
亦名枯木吟汪志

靈璧號竹憨吳江人來潯寓圓通庵善山水花鳥多墨筆自率
胸臆脫略恣肆兼長草書復善詩又有超一字參魯震澤鎮莊
氏子出家姚田庵後爲堯峯主席詣力精純門庭嚴峻年七十
示期趺坐而化汪志
懸證初名元證故副使孫旭也其父自紹興遷潯旭字子旦少

機警歸安籍康熙丙午武科舉人屢遊京邸不遇還而皈依南
潛字之曰轉庵耿精忠反總督姚啟聖募士入閩旭往應募貌
旣修偉又有口才啟聖悅之旭請招某山寇寇受撫偕旭至縣
縣令以賓禮待之縣有捕役素恨旭白令曰旭所招盜名在捕
中有年矣按縣牘良然於是執旭及盜鞫訊具服解赴浙省臬
司獄時軍事旁午囚多淹禁旭與解役私相結乃移旭還縣出
北新關遂與解役逸凡七日而至建昌府詣樂燦軍樂燦者耿
逆之大帥也旭改姓名爲王懷明自言聚兵爲義師不幸而敗
燦及參軍周發祥信之爲具衣冠署僞職燦敗發祥以殘卒千
人歸吉安賊將韓大任大任求幕客發祥以旭應一見相契遂
用事權傾一軍 大兵圍城簡王安王皆招降大任猶豫時康

王偕姚啟聖經畧閩事旭欲大任就啟聖諸招降者皆阻不允
 贛州折爾肯遣魏祥來招降祥字善伯寧都人負重名旭忌其
 才恐大任為所動則奪我閩約構祥於大任大任入其言怒曰
 二王招我我且未許折爾肯何人乃欲以藩臬為餌乎命旭收
 祥榜掠慘毒發祥爭之不能竟殺之旭日說大任入閩大任亦
 以諸招降前已皆不允非閩不可遂從旭言降于閩旭以招降
 功議敘任貴州糧儲道按察副使練兵督餉上臺頗稱其能未
 幾滇黔削平凡投誠者槩不錄歸里一門血屬死無子遺廬舍
 亦焚毀一空旭自傷遂祝髮為僧於仁王山之寶華庵自謂精
 于數學高談雄辨純用機法聳動搢紳當道雖山居蓬屋戶外
 履常滿者四十年壽八十三卒有侶雲詩集

汪志按庭聞錄旭為僧號諦暉住持

靈隱寺今攷張彙諦暉和尚塔銘及厲鶚雲林寺志諦暉名慧
 輅吳興金田沈氏子順治中已出家雍正三年卒年九十九乃
 別是一人庭聞錄誤也慶雲按覺羅棟歡亭續錄所載轉庵
 和尚事略與此傳不同之點甚多因並錄之和尚俗姓孫名
 旭餘姚人嘗不逞數十人為閭閻之害邑令不敢攖君慨然曰
 有盜邱甲聚害而不為援非人也因選強弓利矢命壯士負
 目覩鄉里受害而射殺之獨邱甲潛逃隱恨刺骨時海禁森嚴君
 素慕鄭延平知人嘗謂人曰今之人豪惟海上鄭公邱甲挾蜚
 語訟諸邑中邑令亦嘗謂人曰今之人豪惟海上鄭公邱甲挾蜚
 將軍韓大任招至帳下甚為賞鑒曰奇男子也去滇南吳逆叛偽
 為安親王軍所阻吳逆促其師期大任爽然曰吾竭力以事吳
 王何相迫若軍之阻吳逆促其師期大任爽然曰吾竭力以事吳
 大任曰將軍之事吳王已至矣為之闢地攻夫報國時也因說
 之謂招徠數郡未聞王有尺素之獎今一旦偶愆師期不克復
 辱詈待以奴隸兵戈方始其慢士已如此吾恐鐘室之禍復見
 於君也韓為色沮會先良王遣姚制府往招撫大任遲疑未決
 君復進曰今日大清恢復大任乃從撫先吳王之制表授道銜將
 軍何尚作兒女之態也大任乃從撫先吳王之制表授道銜將
 慨然曰吾本國家赤子不幸陷於非罪不得已逃諸賊藪今得
 返歸鄉井復為聖世之氓吾志已伸敢以纍囚之軀汚章甫之

榮哉因辭職不受久之薙髮為僧居杭州侶雲庵號轉庵和尚年八十餘始逝亦奇人也

蔭在字香谷一字願桂號檀庵吳江皇甫氏子順治丁亥年十一為僧于葉港妙華庵丙申來潯住明義庵從張雋遊授以詩訣始以詩鳴參南潛于補船村遂師事焉後之海寧旋歸胡漫雙林寺乙巳隨南潛作楚遊以病目先歸復至雙林嘗主菁山常照寺以患癥結歸刺舌血寫華嚴經未竟卒於妙華年三十八庵側民家未幾生子不茹葷血長願出家于庵亦刺舌血續書之既竣旋示寂咸以為蔭在轉世云弟子戒石字友山住雙林寺亦能詩時往來于潯是時明義庵僧能詩者又有明鑒字無塵號埽葉行者汪志

宗嚴字霽庵本姓丁西柵裘莊人所居埭溪後為江蘇洛溪妙

智寺僧喜文墨為詩格韻恬靜在中唐晚唐之間有曉宜齋遺稿為其族人丁蟾錄而序之妙智寺 國朝以來其緇流卓越者如月堂岳青且平南詢止三默安諸人率皆博雅工吟詠與當時名人相酬唱而霽公尤雅迨後繼起者有浣塵即丁蟾從弟在瞻祝髮於此亦能詩而懶不收拾乾隆十八年主雲林方丈二十年蒙 恩賜 紫妙智之名之甲於數郡其賴霽公諸人倡於前尤藉在瞻之繼於後云采曉宜齋詩序

秉融一作智融字覺海一作學海號問月又號得閒系出餘姚

王氏其父渡江來潯教授童子因家焉幼好獨處不茹葷血七

歲出家明義庵受詩法于紀遠從遊垂三十年遠歿助其喪葬

又刻遺詩將示寂諸法孫請留一偈曰赤條條來赤條條去死

了便燒復留何偈遂趺坐而逝年四十八建塔弁山之麓潯上

詩僧有學讓字月樵吳江人吳中積善寺僧後主潯東極樂庵

又有達塵亦字月樵震澤馬氏子梅堰顯忠寺僧嘗授徒于潯

居東藏寺妙境庵圓通庵者數年

達曾字竺峯

振興梵宇及長才識過人凡重任鉅舉及人所難能之事獨喜

當之無倦色震邑有崇福永樂寺者在麻溪之濱久廢師往為

募貲重建務極宏麗凡數載訖工仍返東藏東藏亦舊刹而寮

舍不多規模甚狹師乃相度其勢逐漸改營弗吝所費既久遂

成名藍平生澹泊自持能鼓琴喜吟小詩畫梅師煮石山農疏

峭厯落得法外意弟子悟詮號柳橋儒家子嗜古精鑿工書所

蓄端硯多上品柳公弟子證淳

山水俱有秀挺之致學詩更超畫參香光之席

生氣象尤非尋常禪和子所能望其肩項

都督貽汾見其所作極稱賞即馳緘素乞畫而墨緣已抱疾不

能起辛卯六月竟化去年纔二十九墨緣體素弱清削見骨而

負氣兀傲其于緇流罕有合意獨喜親才藝之士固亦矯矯自

拔者

崔和尚失其名一姓胡氏詩人胡珊之子家在北柵幼為僧于

川廣之間母老家貧依兄嫂以居一日母病亟念少子不置僧

忽歸攜金與兄供藥餌且曰母疾無妨尚須數年耳母果漸瘳

僧乃辭母泣然而行謂兄曰吾不能復與母言矣五年後當再

來襄兄大事也至期母又病僧復來則母已神昏不能言因出數十金經紀喪事營葬畢乃別兄曰此後當雲遊了生死大事兄亦不久歸山矣逾年兄歿遂不復來

汪志

慧澄南潯方丈港朱氏子名璇自幼茹素年十八隨父至武林遊雲棲徘徊其間遂有離塵之想歸家梵誦如素習已而至鎮江金山寺削髮居三年復歸故里里有民心寺枯寂殘破慧澄卓錫其中虔修禮誦四方僧侶咸樂親焉於是募建殿宇重裝佛像不十年蔚為巨剎復築望暉樓環植梅花花時集居士數輩吟嘯其中慧澄又工琴偶一勾撥淵淵作金石聲所為詩託物喻情無非發明宗門心要故人皆尊崇而敬禮之惜所作不

傳采訪冊

慧性逸其名台州人中年在天台山某寺祝髮光緒初朝山至南潯南柵康王寺而卓錫焉寺門供關帝屋瓦僅存非社飲無香火然地當孔道行人憩息早晚尤多慧性於隙地栽蔬種竹禪誦之餘兼課農桑出其餘力日施茶夕燃燈鄉人稱便咸與敬禮居數年重建武聖殿鎮紳周昌大憐其誠而嘉其勤贊助之力居多而慧性益加奮勉修康王寺橋則監工有勞鋪簡五塘石路則獨力籌款復於廟旁建觀音大殿及天王殿榜曰裒能古寺觀音殿後擬建文昌閣乃籌捐未集而恒化慧性抱扶危濟困之懷已無力則募之人適鎮紳劉鏞好善彌篤晚年購米濟四鄉之艱食者曰愛米注冊領米歲以為常南鄉一帶分配升斗悉委諸慧性慧性實心任事不辭勞瘁跡其生平行事

皆足以信今而傳後豈可以常僧例之采訪冊

已上僧

周科耀一名道昱字靜涵嘉興人初居武康昇元觀後住潯南廣惠宮清靜自修習青符五雷秘法雍正癸丑夏大旱延科耀登壇禱雨立應知府唐紹祖褒以詩并序知縣羅懋給為霖潤物扁額手輯昇元觀事自元人戴表元以後名士之記序題詠都為一集著補閒吟草四卷廣惠宮又有毛樸庵失其名又有閔九陽並能詩汪志

沈澄初名一秋自號白華道人本德清儒家子居塘栖白栗山之福清宮性嗜梅滿山徧植梅花當梅花盛開輒晝夜坐臥其中善畫工詩光緒壬午癸未間寓南潯城隍廟賣畫自給山水

人物花鳥莫不神妙筆意蒼古渾脫自成一家咸同以來罕有其匹後歸福清宮卒年五十七李宗賢墨溪贖墨

已上道士

智緣字常一嘉興荷花地蔡氏女也年十七皈依明巖為師十九歲披薙住嘉興保壽院焚修勤學潯北萬善庵始于明季有東明永遠兩比丘尼募隙地于董氏創建殿宇康熙中延陽山崧濟住持二載癸巳復延智緣主方丈規制悉依雲棲株宏之法駐錫萬善數十年汪志

已上尼

南潯志卷二十三終

南潯志卷二十四

里人周慶雲纂

列女一

元 姚某妻管道杲 陳自幼

明 沈安女沈瓊蓮

范某妻朱氏

朱緯妻沈氏

温九思妻陸氏 母沈氏媳茅氏孫女寶德

温伯生妻吳閨貞

紀有徵妻吳氏

朱鎔如妻王氏

張二孃

張洪妻蕭氏 妾陳氏

沈之濞妻吳氏

華士嶠妾曹氏

紀有經妻徐氏 金未聘妻紀氏 紀氏婢

莊日強妻蔣氏

董嗣昭妻李氏

董嗣暉妻茅氏

董氏婦

溫某妻葉氏

吳某妻陸氏

子婦張氏

方章甫女

皇甫申之妻孫氏

莊廷鑑妻某氏

清

董廷勛妻顧氏

顧士傑妻黃氏

程嘉和聘妻潘氏

華宏宙妻沈氏

華仁漢妻盛氏

程文煌妻孫氏

莊明揚妻潘氏

莊之琳繼妻沈氏

紀志光妻溫氏

妾張氏

吳有思聘妻姚氏

丁夢暲妻蔣氏

朱念紹繼妻王氏

溫方妻莊氏

莊濟妻王錫蕙

朱乳母

王贊匡繼妻吳氏

繼高祖母張氏

夏開衡妻姚氏

紀又紘妻吳氏

紀又純妻童氏

董士驩妻胡氏

梅軼倫妻紀氏

董紹宗妻金氏

董三鳳妻金氏

董承勲妻徐氏

潘尙仁妾蘇始芳

夏祖勤妻孔繼光

邱元文妻龐氏

子婦莊氏

董豐垣妻姚益敬

蔡雲妻董琴

董啟埏妻吳年

溫中黃妻葉氏

翔何妻周氏似蘧妻董氏

張鴻宋妻倪氏

沈文聘妻董氏

潘潤之女

程某妻陸氏

沈方安妾欽氏

沈斗南妻陳氏

潘祖德妻溫氏

陳濂繼妻紀氏

丁貞女漱六

許某妻蔣氏

謝恆若繼妻徐氏

計元夢妻吳氏

李世華妻程氏

子龍光婦蔣氏

某氏妻顧氏

某氏妻沈氏

蔣麗天妻倪氏

丁斗南女

朱某妻張氏

高氏

李貞女

沈烈婦

高士奎女

溫坤聘妻范瑞珍

丁起堂妻沈氏

丁源妻沈氏

紀峻女

姚松年妻李氏

姚泰交妾尙氏

丁大奎妻潘氏

金邦禮聘妻方氏

張其昌妻金氏

金豫豐妻華氏

薛漢升女

汪曰霖聘妻陸氏

李某妻某氏

邵某妻曹氏

朱杰妻李氏

芝田妻吳氏

姚永貴繼妻鄭氏

王承霖妻盛氏

徐蒞

溫純妻嚴文

繼妻吳德韞徐孟賢妾王氏

吳錦江妻李氏

董慶槐妻汪懋芳

汪延澤妻趙菜

女汪曰采汪曰杼

湯祖訓妻蔣氏

孫錫琛二女

李思周妻黃氏

李世元妻黃氏妹二姑

朱烈女

溫文俊女妻張氏

沈祖培

沈思藻妻嚴氏

施敦裕聘妻張妙貞

錢氏

紀七襄妻嚴氏

承瀛妻潘氏

袁烈女

王錫瑞妻鈕氏

周寅亮妻沈氏

周良苗妻許氏

吳烈女

蔣齧妻吳氏

周昌大妻董氏

弟昌熾妻沈氏

溫晉妻周氏

徐珊姑

劉保康妻陸氏

董春齡妻萬氏

吳能臣聘妻李蘊姑

邱培恩妻沈氏

張輔妻周氏

李邦治繼妻張氏

謝書紳妻湯氏

書元妻吳氏

張氏婢愛姐

某氏婢瑞香

邢勝奎妻李氏

劉安瀾妻邱氏

周慶奎妻徐熙珍

張令如繼妻潘氏

元

管道杲道昇姊適南潯姚氏善書嘗爲道昇題畫縣志云吾妹魏

國夫人仲姬見訪于南潯里第宴坐君子軒夫人笑曰君子名

軒何以無竹爰使奴磨墨寫此幅于軒中履園叢話君子軒疑在北

柵汪志後有陳自幼適南潯姚氏縣志一意奉佛有手書觀世音普

門品玉臺畫史趙孟頫題其後姚氏之婦世以書名稱爲韻事縣志

張二孃宋季南潯人嫁吳江十都陳熙載孝事舅姑和睦宗族

夫亡無子父母憐其少欲爲改適張守志不可奪久之乃立夫

姪文煥爲子教養如己出逮至成立而張年已八十餘矣元元

貞初震澤巡檢王守讓震澤鎮學教諭賈復爲上其事大德二

年始旌其門閭汪志

明

沈瓊蓮字瑩如烏程人世傳富民萬三之後父安弟溥俱舉人
 母李氏晝夢孤鸞含碧蓮花下卧內覺而生慧甚博覽經史過
 目成誦八歲口占協聲律天順末置女史典宮籍詔徵天下才
 女吳楚以瓊蓮應時年十三入為女秀才憲宗御極供奉禁苑
 暇飼白鸚鵡教之誦尚書無逸篇靜志居詩話一日當進御瓊蓮
 伏地叩首曰臣本江南儒家子待罪校書足矣希恩微寵復何
 敢覬得請孝宗嘗試守宮論瓊蓮發端云甚矣秦之無道也宮
 豈必守哉上悅擢第一厯官女學士卒于宮中嘗製宮詞十首
 與寄兄送弟諸律世多傳誦人呼為沈閣老縣志時人以為婕妤
 花蕊不足多讓府志

張洪妻蕭氏妾陳氏洪任甯波教授嘉靖丙午倭寇犯甯波隨

夫同殉于官署

縣志

旌表詳人物張洪傳祀府學節孝祠

汪志

朱氏生員范某妻朱經女少師國禎之姑也歸范甫週嘉靖癸
 亥年二十一夫卒慟絕乃集內外戚屬請後于舅姑孤立中絕
 復遭舅姑之喪遷徙流離半畝之宮不蔽風雨鄉人式其門曰
 斯非范節婦居耶何不幸如是國禎初貴以父喪歸氏謂之曰
 若將以貴重耶妾聞布衣之士賢於肉食者多矣子之父是也
 其毋忘父之所欲為者國禎唯唯曰謹受教守節三十四年卒
 國禎誄其行劉宗周為撰傳萬曆二十七年旌表祀府學節孝

祠

汪志

沈之鑿妻吳氏嘉靖丙寅之鑿溺死氏年十九撫嗣子汶家政
 甚整業日拓汶有俊才早貢為博士有郎廷瓚者貨金十鬻妻

以償氏聞亟還金贖之盜入室氏厲聲曰我沈門老寡婦刀不
去手犯卽自刺盜駭愕散去人服其膽識祀府學節孝祠汪志

朱緯妻沈氏給事中沈之唵女少師國禎之子婦也夫有心疾

不通人道氏侍奉無怨色夫亡矢節孝事舅姑國禎亟稱之汪志

水部華士嶠妾曹氏二十六歲水部臨歿以氏年少欲遣嫁之

氏憤然曰從一而已誓死不二及水部卒氏端居小樓矢節五

十五年范志

温九思妻陸氏年二十四夫亡遺孤璜與姑沈氏同居破屋一

間無帷帳歲大飢姑病且餓同坐卧一板箱種火煨粥以爲食

手不停鍼每歲祭享衣食束修紙筆之費皆自淚痕指血中來

姑卒哀毀如子守節五十年卒天啟七年旌表建坊璜爲祖母

沈誌墓云大母與曾大母同貧困者二十餘年與母同孤寡者

三十餘年大母與母同卧起母泣則大母與俱泣母飢則大母

與俱飢母鍼帶徹昏曉大母與俱昏曉嘗教母曰寡婦有三安

一曰安命不安命者瞋天仇地父母公姑視同冤業一曰安貧

不安貧者怨己責人手足頽惰乞貨無厭一曰安分不安分者

燒香種福結伴出門招搖人目母謹守此三言以終其身年八

十六無疾而逝璜述陸氏之訓爲貞石堂家訓一卷一名温氏

母訓縣志璜妻茅氏璜授徽州司理府志甲申聞京師陷欲伏刃死

氏勸之曰縣志君父大仇未報徒死無益也願公稍延性命俯徇

歙人之請乃整頓疆宇防遏土寇稽永仁温忠烈公寶忠傳王師下江南縣志

鄰郡縣皆望風潰李長祥徽州府司理寶忠温公傳璜退居淪阮縣志從弟以中

勸之歸璜曰吾守土臣義當與此地為存亡汝護持嫂氏挈姪輩還里門毋以余為念弟迫氏就道氏檢衽正色曰夫死異鄉婦歸故里於心忍乎夫願竭忠婦不引節於義安乎嵇傳指天作誓願殉死一處弟遂涕泣而別兵至縣志璜慨然語氏曰吾生平學為聖賢不過求今日處死之道耳因繞屋而走氏曰君之遲留得無以我及長女寶德在乎四庫全書提要請先死舊府志時女已寢氏呼之起女問何為曰死爾四庫提要女即引頸氏手結帨授璜對拽女仆地有頃動氏曰其投匕如其言乃死女死李傳氏遂整衣卧通鑑呼曰刃我縣志璜以刀截其喉輟覽未殊氏猶出一聲曰再刃我璜復力裁之遂絕璜乃自殺縣志

溫伯生妻吳孺人系出前坵名閨貞父仕詮登萬曆甲戌進士

生而敏慧端莊幼能詩得季父諱夢陽北海之傳及長作配溫伯生太傅文忠公司理寶忠公皆其族也伯生苦志力學不得壽生一女無嗣孺人歿其壻與外孫景先輩訂其詩稿鍾伯敬有評名曰吳節孝詩選刊板行世節錄詩選序言

生員紀有經妻徐氏萬曆癸酉年二十七夫亡無子惟撫一女守節十餘年女字金來聘未嫁夫亡汪志紀母適病訃至女輒脫簪珥衣縞素請往哭母大詫曰必吾死乃可竟不得往時時飲泣或至失聲居頃之母死女殯斂如禮卒哭不卜日遂行攬涕登輿道路酸楚及門下車拜匱號慟幾絕命侍兒治觴寘靈几前合盃如生人禮自堂下趨登樓闔門閉影終歲不出事姑氏至孝晨夕奉祀咸備儀卒無纖芥忤姑意董斯張紀姑欲以羅

氏甥為來聘嗣女以立異姓非禮堅執不從乃立夫兄孫紹祿

為夫後茹齋十年而卒汪志年二十有七女以一婢自隨婢事女

甚謹寒煖甘苦亡所辟遣之嫁弗應願終身事大家迨其殁落

髮從浮屠貞女傳按汪志云有二婢借主母苦節主母歿二婢不嫁隨歿二說不知孰是萬曆二十七年

請旌建坊私謚貞愍朱國禎撰碑記祀府學節孝祠汪志

紀有徵妻吳氏萬曆丙子年二十四夫亡子象衡甫生兩月撫

育成立汪志戊寅以後連遭奇荒潛鬻衣飾以濟族中不能自存

者縣志姑卧病數載調攝侍奉始終不怠守節二十四年汪志

生員莊日強妻蔣氏年二十八夫亡遺孤甫三歲家貧又值歲

飢晨昏紡績僅餉其子而身甘窮餒迨日強弟日宣欲請表其

節氏不欲以節自顯力止之祀府學節孝祠汪志

廕生朱鎔如妻王氏汪志鎔如文肅孫也以烏程學鼓眾北拒事

敗為北師斷其喉其友潛抱歸以楮封喉而殮之查繼佐魯春秋妻一

慟而絕既蘇日痛哭腸斷死朱國禎傳

進士董嗣昭妻李氏嘉興王店李原中女萬曆乙未汪志進士初

第卒于京氏年十八聞訃幾絕無嗣立姪詵為後二歲而殤以

兩姪孫分祀范志善事孀姑約束內外歲戊申大祲捐穀帛以賑

鄉里設義田以贍宗族天啟六年撫按贈給旌扁粟帛疏請建

坊崇禎五年卒朱國禎撰傳祀府學節孝祠汪志

附監生董嗣暉妻茅氏歸安花林茅國縉女萬曆丙午嗣暉卒

方病劇時氏刲臂肉和藥以進卒弗效侍孀姑長齋禮佛以終

其身守節十五年卒年三十三嗣暉弟斯張為賦旌志詩汪志

董氏婦南潯人不詳夫之名號亦不詳系出何氏及何時人惟

吳江午夢堂集刊于崇禎間皆當時才媛之作婦有詩選入云

嫁始逾年抑鬱而卒

潯溪詩徵

溫某妻葉氏溫七里人乙酉兵掠馬溪嫂妹數十人俱登舟葉

猶立岸上兵猝至投水死已而舟重自沈軍士悉鈎出之葉獨

不辱

府志

陸氏通判陸以載女嫁歸安前邱吳某順治乙酉寓居潯西六

里橋同媳張氏生員張大成女避兵田間張為兵所獲陸急奮

救俱厲罵遂同被害時年三十四其姪陸律記其事張年二十

一同祀府學節孝祠

汪志

方烈女裘莊方家港方章甫女時官兵追盜道出裘莊被掠登

舟乘守卒稍懈奮身投水死次日尸浮面如生年僅十三順治

乙酉十一月二十九日也祀府學節孝祠

汪志

吳江六都皇甫申之妻孫氏吳漢孫濟寰女順治乙酉挈家避

居裘莊方家港時劇盜沈判劫潯官兵躡之所過淫掠氏方理

髮申之走告曰兵至矣氏從容曰吾死分耳勿畏兵入欲污之

氏齧其肉兵怒糾三卒共逼之齧愈甚不得近兵乃引繩緝其

指懸于梁呵之曰不從則死氏嚼血罵曰速殺我毋多言遂殺

之申之先傷于刃仆地鄰里救之甦感其烈遂薙髮為僧氏死

與方烈女同日里人稱為雙烈祀府學節孝祠

汪志

莊廷鑪妻值明末寇亂一日攜婢探親途遇寇掠婢去不從死

鑪妻遁歸白其故旋自縊死

湖濱雜記

清

明副榜董廷勛繼妻顧氏歸安瑤莊顧爾祿女事姑盡孝汪志夫

患癩疾悉力調養不愈經理內外備極辛勤縣志崇禎壬申年二

十七夫亡守節二十四年撫孤漢策成立教以義方氏有傳家

序一篇自述甚悉順治十三年 題旌胡襄撰傳汪志

顧士傑妻黃氏士傑卒子世鉉纔八齡氏以兩世讀書均撻錮

疾早世不令世鉉習舉業而世鉉好學不倦胸多詩卷氏丸熊

教子志矢柏舟郡守有貞心匪石之旌額鄉黨榮焉潯溪詩徵

程嘉和聘妻潘氏潘宏次女尙仁尙智之姑也嘉和世居徽州

康熙丙午舉人後遷于潯初娶王氏卒續娶潘氏卽宏長女又

卒復聘氏爲繼妻未婚夫亡氏聞訃卽自經獲救乃縗經歸程

氏時年十九撫前妻子女極慈愛家人罕見其言笑守志六十

餘年康熙五十九年 題旌董燠爲撰行狀汪志

華宏宙妻沈氏甲申盜起宏宙率鄉勇禦之族人仁漢有膂力

與寇格鬥遇害宏宙中矢而殞氏年二十五撫襁褓兒給饗殮

于十指苦節四十餘年仁漢妻盛氏當寇盜蜂起蹂躪鄉村氏

匿亂草中以免而仁漢遇害氏方三十歲撫孤守節四十餘年

兩孀均於咸豐九年 題旌彙采縣志汪志

休甯臨溪程文煌妻孫氏休甯陽湖孫揚清女文煌字履輝號

王子于順治乙酉遠遊閩粵兵燹道梗存亡莫問己丑春有族

人自蜀中歸云文煌以丙戌年授西川經歷赴任途次遇賊斃

矣時孀姑在堂孤子章基僅五齡仰事俯育備極艱苦及章基

長賈于湖州遂迎養于湖康熙甲寅遷潯戊午秋感微疾預定死期及期而卒異香滿室者三日年六十一章基扶柩還葬休甯與其父衣冠合窆黃周星為撰傳沈三曾撰墓志章基有述哀詩八章翁燧為跋汪志咸豐九年題旌縣志○按他處人寓潯者舊志或載或否今一例載入不復分析後仿此又文煌為殘明殉難之臣雖身未至潯而藉以附見故特詳其字號仕履寓闡幽之意焉汪志莊明揚妻潘氏年二十六夫亡含殮後即吞金不死復絕粒妯娌勸之幡然曰父母歿而無兄弟我死誰營窀穸乃復飲食出簪珥衣服鬻之以卜葬其父母歸拜夫靈見妯娌強為歡笑俟夜靜闔戶自經時年三十四雍正十一年題旌

監生莊之琳繼妻沈氏給事中沈士茂女年二十二夫亡撫二歲孤成立家貧連邁舅姑之喪殯葬盡禮當潯溪寇發時里人

咸奔竄氏獨守孤閉戶曰寇至即死此耳去將何之卒獲免守節三十八年朱鶴齡温睿臨並為撰傳祀府學節孝祠汪志

廩生紀志光妾張氏康熙辛未志光亡氏年二十七志光妻温氏年三十五張依正室茹苦勵志共撫嗣子言成立温守節四十二年張守節五十二年汪志

姚烈女姚家埭人孫變烈女詩吳有思聘妻雍正癸卯年二十一汪志結褵有日夫遽殂列女詩聞訃自躍墮樓家人救之卒不食死汪志後人罕有知之者越百餘年列女詩序有思從孫汝雯為賦貞女篇里人孫變為賦烈女詩祀府學節孝祠汪志

生員丁夢暉妻蔣氏監生蔣儀仲女順治戊子夫亡遺孤洪祖甫週痛欲自經數以救免既而日未亡人去孤誰撫於是以撫

孤保家泣血自矢洪祖早卒復撫三孫成長時有兩世喪未葬葬之以成夫志康熙十八年卒知府胡瑾給扁旌獎董漢策撰傳毛際可作旌揚節孝錄序祀府學節孝祠汪志

朱念紹繼妻王氏仁和王羽妹念紹烏程廩生康熙癸卯以史案牽連得禍氏例當發遣即買一小剃刀佩腰間以眷戀幼子

未引決及幼子殤有強暴欲窺之者氏引刀自斷其喉血流被體見者驚走越日卒過其門者皆目為王烈婦家前妻之子駿

擎負骨歸葬祖塋之側祀府學節孝祠按念紹即朱佑明之長子汪志

莊孺人字輯里温方其為婦也夫已病疴以莊母病卜贅壻吉既成婚莊母不起夫歸就醫且赴試未幾卒孺人猶女子也翁憐之勸之嫁孺人以死誓歸於温家四壁立早夜勤女紅於淒

淒一室中為其翁所稱聞不聞人聲者二十三年康熙甲寅二

月三日卒享年四十有三宗族鄉黨無不哀之諡曰節孝温棊忱莊

孺人哀詞

莊濟妻王氏名錫蕙字樹百吳江處士王錫闡妹也濟字日鱗

本南潯莊廷鑿之子年十三入泮以文名聘錫蕙未婚以家禍

戍瀋陽錫蕙誓不更字日夜涕泣求死母吳護之得免其戚震

澤沈鎌哀之為子身走塞外設奇運策卒歸其夫而合配焉濟

贅錫闡家乃改姓王潛心正學於身心性命頗有所得卒年五

十二著半硯齋詩文集錫蕙性淑敏能詩文錫闡以精算學名

兼會中西之術各取所長益以心得世推絕藝錫蕙得其指授

亦通天文推步勾股算法婦女中所罕見也有倡隨集五卷縣志

史案發難時松江乳母朱姓或曰謝姓曾以珠籠匿廷鉞三歲子繩武遁跡松江與其夫紡織以爲食後莊氏求繩武歸及長思報乳母夫婦恩竟不可蹤跡湖濱

王贊匡繼妻吳氏吳有雋女汪年二十二適王生子高升甫踰

年贊匡歿前妻子高明纔毀齒世以醫爲業無儋石儲氏俯仰

危苦供舅姑菽水提抱孤雛日營手幹閱十年而舅卽世姑耄

且病困頓牀第氏持匕箸進飲食卧起扶掖身自浣滌無形無

聲息息與姑意屬俾罔異康甯者又垂十年而姑棄養積鍼頭

綫尾之功爲高明娶婦居無何婦天哺遺孫再娶婦復天再哺

遺孫內行淳備曹大斌王門守節二十五年汪贊高繼高祖母

張氏婚十八日而寡守志六十四年而被旌吳氏

編修夏開衡妻姚氏吳江泮溪姚紳女年二十三歸開衡四年

生子女各一開衡官翰林氏留家子殤氏爲夫置妾携幼女同

至京而女又殤開衡亦疾作瀕死屢顧氏哽咽氏泣曰果有不

諱我誓不獨生及卒氏閉戶投繯旣而曰吾死如靈輻何因扶

柩而南過淮之日市白綾手縫命服復買命婦冠返故廬入拜

舅訣曰氏夫亡無子只有一死耳舅命以叔子爲嗣答曰誠善

然長養成立在叔未亡人何能爲舅令家人守之氏乘隙服冠

帶自縊死知府唐紹祖知縣王懋訥給扁額沈近思金梅曹大

斌並爲作傳謝洲作烈婦篇祀府學節孝祠汪

紀又絃妻吳氏雍正乙巳年二十七夫亡撫又絃兄又純次子

武魁爲嗣守節二十四年又純妻童氏又純卒時二子文魁武

魁爲嗣守節二十四年又純妻童氏又純卒時二子文魁武

魁生甫五月童氏偕孀姊其矢柏舟俾兩兒成立童氏雖中年守志其苦節亦不可泯沒也汪志

胡氏德清諸生廷最女年二十四歸烏程董士驥結褵未暮而歿氏吞金絕粒百方覓死既乃瞿然曰吾過矣吾不可死夫亡而夫之子道未終奉舅姑以待季之立吾責也吾固不可死遂衣粗食澹主中饋事舅姑惟謹而夫弟仲士驥出後叔父季士驥既壯生子嘉言舅命撫為嗣未幾姑卒又數歲嘉言所生父母相繼卒無何舅又謝世值戊子己丑大祲凶喪洊臻氏盡瘁支吾與嘉言形影相依者十年嘉言始娶婦氏曰前者生無以生死無以死今後以畢餘年下見吾夫子於九原無憾矣雍正己酉嘉言將為母舉七十壽觴氏曰吾以是日生汝父以是日

死五十年來每當是日不勝悽絕忍言壽耶曹大斌節母胡氏傳

紀氏十有八歲歸梅軼倫姑方嚴厲不以婦弱稍假借氏上承

下接惟恐弗當姑意井曰烹飪紡織鍼黹畢萃厥躬無絲毫怨

懟見於顏面曹大斌紀氏畫像記年二十四夫亡汪志無嗣撫小姑子楫愛

如己出俾老姑有含飴弄孫之喜以忘其榮獨姑歿數年而氏

歿壽六十畫像記苦節三十六年汪志

監生董紹宗妻金氏內閣中書金秉樸女潯溪詩徵少學詩於族兄

梅亟稱其瀟灑有林下風氣董氏詩萃著蘭玉軒稿詩徵

董三鳳妻金氏吳縣金天章女潯溪詩徵夔居年未四十持門戶撫

三孤不愧懷清華日南金氏小傳有綠窗閒詠一名吟香詩草詩徵貞燕

離鴻音節淒婉見者傷之府志

長蘆鹽運使董承勲妻徐氏石門監生徐行灝女潯溪詩有意

度惜年三十三歲卒未竟所作董氏詩萃

錦州知府潘尙仁妾蘇始芳字幼馨號心石又號筠綠居士山

陽諸生亢生女潯溪詩徵著筠綠賸稿有瀕危口占與夫子訣別八

首末云指上玉環如可驗他生重得侍章公趙虹作賸稿序謂

越十六年尙仁娶得沈大家詢其誕彌日時卽蘇姬卒之日時

言貌舉止亦與前身酷肖癡情偶結竟獲再生詩言遂成讖語

乃知齊諧志怪不盡無稽也南潯備志

孔繼光字德隱號范湖散人桐鄉人監生夏祖勤妻年二十八

夫亡撫孤守節三十六年學政李宗文給匾額縣志乾隆三十一

年題旌汪氏幼讀書明大義能詩事祖勤病時徧搜醫家言

因粗通其術姑病傷寒處方飲以藥而痊著有詩稿縣志

龐氏烏程龐超倫女年二十二歸同縣邱元文室邱稱令門顧

生計弗裕氏以女紅佐樵米得少紓舉丈夫子二長錫齡次錫

爵某年元文以疾卒氏痛不欲生重兩孤未成立責無旁貸勉

節哀爲末亡人親操井臼至於織紵組紃事無大小必克勤無

怠嘗夏夜苦蠱納足審中避之未嘗釋刀尺雖精力殫瘁勿恤

也其鞠育藐孤以慈母而兼名父良師所爲教乃至出入顧復

寒暑噓拂恩斯勤斯尤無微弗至其後錫齡以市糶致高資氏

撫今思昔蘄有合於持盈保泰之微愓而以不溢守富爲訓飭

尤必躬行節儉爲矜式餘慶所鍾有孫九人寢昌寢熾氏以大

德躋上壽乾隆四十九年旌表節孝五十六年奉勅建坊

於東牖下塘其子婦莊氏樸實任勞有君姑之風椎髻操作如孟光之在春廡是亦婦德所難也

朱祖謀邱節母龐淑人傳

姚益敬字元吉歸安生員姚世鈺女適扶溝知縣南潯董豐垣益敬幼時父但教以孝經女誠等使通大義

縣志

以文翰非女子事未嘗教以詩而益敬竊學之詩即清婉嘗誦木蘭詩問父曰

朔氣傳金柝寒光照鐵衣着色實為大雅若鋪排過多恐近小說

府志

父大奇之有芬陀利居小稿厲鶚撰序以歐陽公目謝希孟有古幽閒淑女之風為比

縣志

董琴字嶧蘊生員蔡雲妻南潯董陳亮女

縣志

奉孀姑盡恭順相夫能規以正教子女亦有法

董氏詩萃

夫婦皆能詩夫中年歿琴銜悲茹痛遂爾焚筆越六年亦卒所著無閨閣綺靡習氣

縣志見董氏詩萃

氏詩萃中者尤蒼老著有靜吟集

府志

吳年字古春號雪庭

縣志

郎中吳聯珠女

潯溪詩徵

歸安前邱人

縣志

同

知董啟埏室

詩徵

年之弟名蘭庭博學多才世所稱胥石先生也

故年亦有才學著雪庭遺稿蘭庭為之序

縣志

溫中黃妻葉氏三十歲夫亡苦節三十年溫翔仞妻周氏二十

五歲夫亡苦節二十七年溫似蓮妻董氏二十九歲夫亡苦節

二十六年妯娌二人甘貧守志孝事尊嫜撫孤成立稱為溫氏

三節

縣志

張鴻案妻倪氏事舅姑以孝稱家貧藉紡織供甘旨鴻案遠游不返仰事俯育備極艱辛晨起操作晚猶篝燈課子女蚤夜勤苦數十年如一日迨年七十餘家已小康猶必躬親瑣事自奉

儉約非賓祭不特殺未嘗入廟燒香嘗曰我非不敬佛第一日拜佛則廢一日正事且積數日之操勞供一日之耗費恐神佛反見責也其達識如此董王錫張母倪太孺人傳

沈文聘妻董氏訓導董正誼女幼許字未婚隨父之任温州年二十一文卒訃至吞金誓死父母許以歸沈守志始得解救時文有老母以哭子喪明族黨恐氏歸重傷其心乃素服毀妝守貞在室越五年姑亡氏自温州奔喪立姪清震為嗣氏母嘗邁危病醫禱罔效氏籲天割臂肉作羹以進母病得愈是夜清震在家感異夢有神告之曰汝母以孝傷臂當療以硃砂血竭凌晨齋藥至則割臂之事尚無一人知也藥敷創口應手而合至孝感神遠近歎異當伯叔析箸時割產以授則堅辭之曰以是

畀我殆以我為分產來耶一無所取守節四十一年乾隆十五

年 題旌汪志

生員潘潤之女適吳江平望王玉成乾隆戊子年十九夫亡遺孤甫晬孀姑在堂玉成兄弟二人伯以貧故就食於外仲惑婦言不能孝母姑就養于氏仲又諷氏他適氏號泣不食仲亦惻然而止貧甚葦席遮門又值大水拮据奉姑自食糠粃榆屑鄰有褚某重其行謀聘為繼室媒之不可乃重賂其父授以金珠一篋父往見氏而難于辭說出金珠示之氏覺其意碎篋痛哭父慚而退褚益重之復啖其弟詭稱母疾迎氏歸母與姑姊妹日夕說誘氏憤甚疾趨而歸弟急棹舟追送之行已十餘里矣自是不復返母家終養老姑撫孤成立凡苦節數十年汪志

程某妻陸氏陸受祺女年十九壻以病篤議婚父母難之氏恚曰果若是則夫未死而先有死其夫之心矣何以事人父母隲之倉猝成禮三日夫卒喪葬如禮願以貧依母而母家亦貧鍼耑自給為夫立嗣苦守至六十一歲卒湖濱張峯之撰傳汪志

監生沈方安妾欽氏吳縣生員欽義方女幼讀書嫻內則方安妻早卒年逾四十子若孫又相繼夭折遂納為妾欽氏年十七越數載舉女二欽乃還吳將再買妾得同邑曹氏女遂聘以歸方安不肯留曰得子遲早有命何多置妾為欽自託有隱疾強而後可甫半載方安病卒曹有去志欽涕泣勉諭且言果肯守志偕老願折節奉侍終身曹為感動乃止既而家漸落凡炊澣鍼耑之事欽皆身任其勞不以煩曹也未嘗有怨色嘗語人曰

我但知為沈家人耳使後有承祧之孫家無再醮之婦幸矣繼族姪之子為孫名曰承宗曾孫猶及見也曹病革欽年已老復遭鄰火移居于鄉益貧且患瘧然侍曹湯藥仍不少懈曹既歿欽曰彼節已全我心斯慰矣即亦繼逝相間僅晨昏耳汪志

沈斗南妻陳氏秉性堅潔紡績惟勤范志年二十四夫亡孝事舅姑撫孤守節七十一年當八十歲時病劇夢父母授以鮮桃二枚食之甘芳遂愈又十餘年無疾而終乾隆五十二年 題旌

汪志建坊在潯西嘗字五圩范志

監生潘祖德妻溫氏監生溫省方女年二十六夫亡撫五歲子晉鼎成立娶婦子又卒孤孫亦殤立姪孫為嗣助媳閔氏守節者又十餘載卒年六十六乾隆五十三年 題旌汪志

陳烈婦紀氏鎮洋縣學生陳濂繼室烏程紀晃辰女也幼聰慧解書史年十六喪父弟在髫齡百務紛如婦佐母持家政井井有條理濂適喪偶聞其賢遂委禽焉濂先有一子一女婦入門撫之如己出事姑盡孝和于妯娌家人咸得其歡心踰年濂赴試崑山得疾歸病甚婦泣曰妾去家四百里而托于君君苟不諱焉置妾也請先死以絕君慮濂領之婦即持錢數枚欲吞家人奪去之翌日濂卒婦視含殮畢闔戶自經急救得不死又自樓上擲下已絕復甦母曰兒有孕倘生男為夫更延一脈何遽死為婦沈思良久曰此言是越數月婦產女也婦欲死而家人守之守稍懈竊出自投後園池中竟死

孫變陳烈婦傳乾隆五十九年

題旌

丁貞女名漱六居丁家港父麟乾隆甲戌進士知廣州之賓州側室陶生貞女子署父卒貞女纔六歲隨母扶柩還里及笄字歸安監生戴璉為繼室璉落魄不事生產伯兄璐官太僕寺少卿往依京邸久不能歸伯兄贈之金使歸娶璉出都又為他事耗去竟不能娶故貞女年踰三十而未嫁未幾璉客死山左貞女聞之慟哭欲自經者再家人救免自後毀容減食常獨坐一室鬱鬱成疾竟卒年三十五

孫變丁貞女傳

監生蔣士鈞女嫁許某不數年夫亡氏瑩瑩子立年僅二十六歲繼姪孫為孫氏撫之如己出及生曾孫文照又撫之嘉慶六年孫又下世氏不食者數日是年文照乃為題請 旌表 旨下氏謂文照曰爾父在日屢欲為此我不許爾今以館食營生

能有多金幹此事泣下久之旋卒年八十七節范志

謝恆若繼妻徐氏徐冠英女成婚三月夫亡投縵七次並以救

免越百餘日卒自經以殉嘉慶十年題旌汪志

計元夢妻吳氏監生吳繼成女乾隆壬申成婚時夫病已篤越

五十日夫亡氏絕食投縵並得救解後母家欲奪其志遂於除

服之次日伺隙自經死嘉慶十四年題旌凌樹屏撰傳汪志

箋四圩李世華妻程氏程廷揚女早寡孝事舅姑撫孤子龍光

龍光妻蔣氏蔣心榮女夫病革氏割股啖之不效夫卒視含殮

畢潛赴後園躍入池水死年二十二學政汪廷珍給姑貞婦烈

扁額嘉慶二十二年與姑節孝程氏並題旌汪志

顧氏姑蘇人府志嫁為本里某氏婦有縣役某催科至其家見而

豔之伺其夫遠出突入內室以手撫其頸氏大驚旋泣語小姑

曰此頸忽為男子手所加豈可洗乎即縊死越兩月役偶乘舟

過潯忽見氏上其舟役告舟人曰吾前日不過手摸其頸何遽

死乎遂發狂投水適遇來船縴纏于項不能解立時流血死舟

人揚其語聞于小姑事始白錢泳記其事汪志

沈氏少鸞為本里温氏婢性不慧恆受人鞭撻父亡母謀改適

氏號泣諫不能止其姊有二子夫死亦適人遂與姊絕長嫁本

里某氏夫有田二畝耕以自給生一子而夫死其夫兄利其田

逼之他適氏曰我豈忘號泣諫母時哉況我有子在將焉置此

踰年子患痘劇求夫兄召醫不應遂死又逼之曰我豈以子故

易初志哉夫兄乃棄其二畝田不為耕氏苦不得食長號二十

日餓死明年新穀升夫兄方餐忽投箸呼曰汝何得食此二畝田遂自搯吭而死張士元記其事張海珊撰傳汪志

蔣麗天妻倪氏震澤舉人倪樹枚女嘉慶庚申年二十九夫亡守節四十五年善畫花卉人物嗣子莖僅周晬撫育及成婚皆出鬻畫之資汪志

丁氏丁斗南女適吳江六都孫麗輝為繼妻合盞之夕夫忽溝異疾數日而卒氏撫嗣子矢志姑徐氏病刲股作羹療之苦節三十年汪志

朱某妻張氏震澤吳淩張寶成女夫喜狹邪又病狂易氏撫子女事夫無失禮姑遇之甚暴見子不肖家業日落又惡人言其子之短遷怒於婦氏雖屢遭辱責無怨懟孝養益謹里黨稱為

孝婦沈珪為記其事汪志

高氏雙林沈世煌妻結褵甫一周世煌患血疾氏刲股調藥不效投縲於空舍家人救之免逾月世煌亡即自縊死雙林鎮志

李貞女許字雙林梁氏子先是梁氏子聘女之胞姊姊死其父母以愛梁故更以妹字之結縲有日矣而梁氏子病瘵死女聞訃慟不食父母慰諭之不解越三日投縲死雙林鎮志

烈婦沈氏父鍾璜母張氏適震澤文學吳榕翁劇生三子溶其長也姑倪氏已歿始烈婦將生母夢雪壓竹晝然如雷裂而醒年二十歸於吳越三載無子夫亡叔幼未婚嗣莫定七終自縊以殉方其夫患喉風烈婦籲天請命屬續後未成服先以白布纏其首烈婦語分裂者曰須五尺既朝夕臨奠不下樓惟小姑

得以登視母家以二嫗伴之視其手製衣履黯然無語終七次日使一嫗焚香於廟餘一嫗始具湯至日將濯足小姑與嫗俱出遂掩戶久之嫗皆至叩之不應共抉戶以入則烈婦已自縊而氣絕解其懸卽前此五尺布耳刑典烈婦沈氏傳大書一十八字曰婦有夫弟奉晨昏夫無遺孤藉撫養不死何待置奩側張海珊吳烈婦傳衣五襲層層結束整齊而不亂履則履墨蓮而其髻盤旋如故顏色不改含之則米一茶一白金一已先自含時嘉慶己酉七月晦日也年二十有三距榕死凡五十三日張傳

高士奎女適歸安雙林沈漢標夫病割股以進不效及夫卒誓以身殉屢縊屢救後防稍弛竟縊死距夫亡八十二年二十入道光八年 題旌汪志

温坤聘妻范氏監生范徵潔女名瑞珍未嫁夫亡父母祕不使知逾年始知的耗矢志欲歸温室頻死獲救者數次旋以哀毀抑鬱成疾卒時道光庚子年二十二温氏迎其柩與夫合窆董恂撰傳汪志

丁起堂妻沈氏馬家港沈中復女汪志母華氏艱於子所生惟氏少時慕北宮嬰兒子之風欲不嫁以養父母父母不許年二十三適起堂起堂父麟廣西賓州知州居官廉罷官卒于粵家無甌石儲先世遺田甚薄不足供饘粥氏入門時姑亦先卒唯起堂生母陶氏存起堂以貧故業賈吳門得疾不能歸氏偕其父匍匐往視之顛天請禱醫治百端竟不起氏慟哭欲以身殉夫父以養姑責之乃已氏善女工晝夜操作罔倦頻遇凶年己食

糠覈而奉姑陶氏食必以粿又以餘力養己之父母凡事姑十
 五年而姑卒喪葬如禮又葬其夫貲皆出自針黹之所積數畝
 之田卒保如故立夫兄子預年為嗣夫祀得不乏皆氏力也孫
 丁氏雙族孫源妻沈氏汪太學生鍾璜女年二十適源源夜讀
 節坊記氏紡績于旁一燈熒然常達旦不寐源試不利父母督過之氏
 婉言以解始得霽顏嘉慶丙寅源父卒源長號連晝夜不止痛
 鬱於中遂成瘵疾病中多恚怒氏愉色婉容多順適其意疾年
 餘竟卒子桂纔六歲女四歲姑年及六旬瘠田二十畝先世棄
 置之餘歲入僅足供租稅氏以一身支撐門戶養老撫孤桂少
 多病醫藥之費不貲姑年至七十餘卒荒歉之餘黽勉以供大
 事又娶婦嫁女凡百所需皆仰給於十指或憫其貧勸令子桂

學賈冀得微利氏曰丁氏之先雖無顯仕然世守儒業名在學
 官今吾子廢學其若先人何故桂雖獨子氏督課之甚嚴及桂
 為弟子員氏心稍慰桂好攻古文辭或言非科舉所宜氏曰丁
 氏先世皆攻時文而科舉不得一當可知窮達有命非人力所
 能為也子苟學古有得雖終身不遇亦有榮於所生況未必不
 遇又何用屑屑揣摩時尙求速化之術為其達識如此孫
 妻年二十九夫亡守節三十六年源妻年二十七夫亡守節三
 十三年汪例合旌表孫道光二十一年汪得旨建坊如制題
 曰雙節里人孫變為之記孫
 生員紀峻女適馬要張鳳池年二十二夫亡無子撫姪為嗣氏
 欲殉夫自盡者再父以大義切責乃止孝養孀姑喪葬成禮外

南清志 卷二十四 三
侮疊至氏每藏短刃於枕傍以自衛數十年如一日年七十餘

道光十八年 題旌 汪志

姚松年妻李氏李象榮女道光辛卯年二十四夫亡撫嗣子守節孝事翁姑生養死葬或勸以事佛祈福氏曰命由天定佞佛何益生平不入寺廟年五十餘 汪志

監生姚泰交妾尚氏蘇州人泰交以無子納之嫡妻褚氏御之過嚴氏無怨色嘉慶壬戌氏年二十八泰交卒撫所生五歲子成立事褚尤謹守節三十一年道光二十三年 題旌丁桂撰

傳 汪志

潘節婦烏程樓下農家女同縣丁家港丁大奎之妻也節婦十歲為養媳迨長與大奎婚年二十八而大奎歿時節婦生子鳴

鶴未百日大奎家世賃田而耕歿後以田歸其主遂無所得食或勸其改嫁則噉然哭且罵曰肯以一婦人而嫁兩夫乎日抱其子乞鄉間夜則為人紡績或雨雪不能出門預留飯食其子而已則忍餓如是十數年後子稍長能為人傭耕乃不復乞然其子生長困餒之中力弱不能耕五畝終歲勤作僅供母子飢粥以故鳴鶴終不能娶婦節婦常以此為恨苦節四十一年卒年六十有九 丁桂書節婦潘氏事 道光二十五年 題旌 汪志
金邦禮聘妻方氏增生方郁女幼失恃育於繼母繼母病刲臂療之以孝女稱道光甲申年十八將嫁而夫亡聞訃即不欲生父母力勸止之越三年縞服歸金守志撫姪為嗣卒年三十二道光三十年 題旌孫燮撰 汪志

張其昌妻金氏嘉慶壬申年二十三夫亡無子苦節母族諷以再嫁矢志不從有無賴子夜叩其門誑以母病垂危氏不為動至天明始啟戶其詐遂敗道光三十年 題旌汪志

華氏華景墀女父病劇氏刲臂以療父無子誓不適人父母知其志因招金豫豐為壻壻不諳生理家益貧針黹以養父母歿竭力營葬親為負土道光三十年 題旌汪志

薛氏薛漢升女適震澤橫漾墩孫梁選年二十二夫亡無子翁諷之改嫁且盡取其資裝使不能自存乃歸母家以針黹自給苦節四十一年董燠撰傳汪志

汪日霖聘妻陸氏山陰人仁和籍知府陸藻女即日霖姑女也道光丁亥年十八未婚夫卒聞訃即矢志求死父母力為勸解遂縞素長齋誓不更字年五十餘汪志

某氏李某妻居西柵石家街口翁康源業銀匠夫早亡氏守志後翁姑微示奪志之意遂投水死時道光己酉方大水其尸倚岸挺立急流之中不仆亦不移人傳為異汪志

邵錦坤之子婦曹氏夫敗檢翁客死湖廣無以為生氏乃為傭媪得值以養姑夫詭言氏母病亟以舟載氏往母家及至則非母家也駭愕問故始知為夫所鬻夫已鼓棹徑去氏欲投水為人所持乃因其勸慰佯為歡笑伺隙即日縊死時咸豐元年氏年二十餘汪志

邑庠生朱杰字硯生方丈港人娶南潯鎮李性川女為室道光辛巳硯生病卒氏年二十有六上事翁姑下撫遺孤辛勤備至

孤至三歲又天再撫嗣子成人氏治家嚴肅終其身不與親族
 男子交談宗族戚黨咸敬憚之守節四十年而卒咸豐朝 旌
 表乃建坊於九里橋西五指東壩與其夫合葬之墓前朱氏家譜又
 吳氏西莊村秀章女嫁方丈港監生朱芝田道光甲午芝田卒
 氏年二十有三無子當夫故大殮後焚化冥鏹時氏投火兩次
 幾不及救踰時始甦青年矢志勤苦自安撫嗣子成立守節四
 十年未經 旌表同上
 姚家灘從九品姚永貴繼妻鄭氏震澤從九品鄭大純女成婚
 未暮夫疾革屬纊時氏潛吞鹽滷及眾覺救已不及遂與夫同
 時死時咸豐癸丑九月二十日年二十四咸豐四年 題旌汪志
 監生王承霖妻盛氏震澤五界亭監生盛元鎔女父早卒事母

至孝母病刲股和藥以進遂愈後又病復刲股竟不效咸豐甲
 寅年三十夫亡茹苦撫孤哀毀成疾越三年卒汪志
 徐茵字湘生號古薌府志又號南林女史蔣寶齡墨林今話生而敏悟祖
 愛之教以經史過目成誦馬要沈宗騫以書畫名東南茵從之
 講論學日進孫燮古薌吟稿序適歸安武生莘開府志開居郡城蓮花莊
 亦宗騫高第弟子夫婦偕隱惟以文章筆墨自娛片紙流傳人
 得之珍逾拱璧一時歆羨以為不減趙文敏管仲姬云吟稿序開
 早卒茵事姑撫子荼苦萬端姑卒喪葬如禮未幾子亦卒茵孑
 然一身府志藉畫以自給其畫絕去脂粉幽秀可喜蔣寶齡墨林今話詩
 氣清而格穩抒寫性靈多自得之趣極人世不堪之境而不以
 損其天吟稿序年邁猶能作小楷府志畫著色山水談詩終日不倦

吟稿 卒年九十餘志

溫純妻嚴氏名文字淑暉幼聰慧善吟詠年十七歸純純謂之曰能畫而不能詩畫即無韻能詩而不能畫詩必無神遂潛心學畫不數月而能花果其病起一絕云蕭蕭秋雨織煙絲遍繞窗前簾幙垂如此輕寒禁不得莫嫌病起曉粧遲惜不永年僅十八而卒純繼配吳氏名德韞字恆卿能彈琴工墨蘭純嘗篆花中疑有曲絃外欲傳神句以貽之蔣寶麟墨林今話 純三娶徐氏名孟賢善書為梁同書所賞謂其可造工詩有理琴閣稿純歿時徐年二十九守節五十三年妾王氏從徐守節縣志 生員吳錦江妻李氏孝翁姑處事能持大體三十無子為夫買妾女紅之外時為口講女訓嫡庶如母女妾生子愛如己出辛

勤操作延師課子夫故家日貧親族有助以資者婉卻之曰人

須自食其力論者無不欽其賢淑縣志

諸生董慶槐妻汪氏候選主事尙仁女名懋芳字蘭晚壽溪詩徵父

喜詞賦命諸女讀書習吟詠惟蘭晚最慧迨蘭晚歸董氏父棄

養遂輟不復為戊子蘭晚稱未亡人老懷慘怛始曰吾少時好

為五七言近體非矜輦悅蓋以博堂上歡耳故三十餘年人無

知之者今欲藉此消遣自是晨夕苦吟楮墨遂夥甫閱數載而

遽永訣矣其子恂錄成一帙趙榮序 為壽花軒詩略詩徵

趙榮字儀姑一字子逸號次鴻晚號善約老人上海戶部侍郎

秉冲女適批驗所大使汪延澤節婦金順之孫婦也生而有文

在其手曰文性耽文史長於議論幼即能詩詞長乃為古文及

駢體女紅之暇常手一編尤喜讀通鑑論史事多特識創議出人意表縣志天性高朗有丈夫風骨陸以恬冷廬雜識曾評註溫氏母訓

每舉以教人其課子以求根柢近者舊相勗嘗曰古云求忠臣必於孝子之門吾謂取友亦然禮為人子者出必告反必面不苟訾不苟笑此小節耳求諸當世已不易覩無惑乎益友少而

損友多也門內之行不修則雖貌為直諒自詡多聞皆矯飾而已勿與友可也其持論之切於事理類如此又通醫籍藥性傳方施藥療人多效有瀘月軒集七卷縣志延澤長女曰采字伯荀

號于繁華亭袁修瑾妻承母訓嫻吟詠有醉愚軒詩稿次女曰杼字七襄號絢霞桐鄉嚴錫康妻亦工詩有雕青館詩草溇溪詩徵湯祖訓妻蔣氏蔣堂女幼時善事父母于歸後有賢淑聲同治

丁卯祖訓疾革氏涕泣不食數日祖訓氣絕氏即吞金以殉氏死而祖訓忽復蘇後一日乃歿縣志

孫錫琛居溇溪咸豐庚申紅羊劫起挈家避輯里村祖塋山莊迨癸亥二月下旬粵匪猝至倉皇之間無舟可覓次女年十八已許字同里夏氏三女年十三未字次女懼為賊辱至祖塋側

北瀋河畔赴水三女不忍其姊獨攬厥難相隨以殉越旬餘賊退出其尸面如生里人驚歎嘉其貞烈郡城克復後其父復繪溇溪雙烈圖求題詩文以表彰之雙烈圖事略

李思周妻黃氏工鍼黹藉十指以供薪水俾思周無內顧憂無子生三女皆拮据以嫁咸豐十年浙省戒嚴里中咸他徙思周巷戰被戕氏罵賊不稍屈賊怒揮以刃罵益厲賊縱火焚屋氏

死之時庚申六月十二日也族人世元妻黃氏氏從姊妹行性
柔婉平居無疾言遠色庚申六月世元被掠黃氏朝夕啜泣目
盡腫辛酉二月三十日賊復至投水死世元妹二姑亦投水死

李氏宗譜

朱烈女南潯人咸豐十年六月粵匪犯潯被掠盡褫衣禪終大
罵不辱身受九刃棄尸於水次日賊退父母覓尸殮之面如生
瞋目切齒猶作罵賊狀傳為奇烈同鎮溫文俊女投水死兩肩
亦各被數刃又有沈祖培妻張氏同治三年為賊所迫堅不受
污身受三刃並剖兩乳死縣志
生員沈思藻妻嚴氏咸豐辛酉夫被擄屋宇皆焚氏歸驥村依
母家紡績自度朝夕焚香祝夫回里同治甲子官兵收復府城

浙江漸次肅清夫終無耗氏度必不返遂絕粒死年二十七縣志

張貞女南潯施敦裕聘妻張兆南女咸豐辛酉敦裕罵賊不屈
賊支解之時女避難上海聞訃吞金二次均以救免繼以姑老
乏人供養遂于歸施氏姑病危刲股以進得痊布衣長齋紡織
養姑撫姪為後教撫恩勤一如己出縣志後居塔院院久荒廢僅
存頽垣壞壁貞女為募資重建蔚為精藍法名妙貞居院終老

采訪冊

許兆熊妾錢氏南潯人避寇寓居菱湖咸豐十年兆熊病篤奉
侍湯藥衣不解帶者月餘兆熊卒氏潛服毒嫡子及孫競為解
救氏誓不復生但囑曰賊氛未靖治喪畢宜速葬先骨少頃而

縣志

廩生紀七襄妻嚴氏洞庭東山太學生嚴鏡池孫女粵亂遷震澤之大廟港匪至倉皇出走子女各奔竄或已被擄氏知事急乃憤然一躍投身于河既死無以為殮越十餘日七襄友席蓉塘聞之始代具棺殮攜歸洞庭東山時年四十有七殮時顏色如生又紀承瀛字都仙與七襄為族昆弟妻潘氏庚申之變其家閉戶潛居匪亦不及入秋匪又至仍不出走謂可倖免豈知是夜焜其前樓壞大門入遇承瀛弟承陞索金不遂戕之登樓見夾牆有人遂擄承瀛及弟承杰子秉璋以去氏潛身出門投御書閣前河自盡時年三十紀嘉記一烈婦事

袁烈女南潯吳玉亭家婢感主母德不願適人咸豐辛酉幼主將為賊擄女力為捍蔽幼主得脫女不及遁投水死時年五十

五得其尸於真清壩橋主人義之為葬於東遷飭二圩立碣以

誌縣

王錫瑞妻鈕氏湖府學附貢生恩卹世襲雲騎尉鈕福蕃女婚甫一年夫亡氏痛不欲生誓以身殉時方姪家人勸以大義且密防之後產一女氏自為哺乳視若坦然日久防懈遂自盡王氏

家譜時同治七年也志縣旌表如例王氏家譜

周寅亮妻沈氏江蘇震澤平望人太學生沈巢峰女寅亮懋遷常外出氏以婦兼子職堂上定省朝夕飲膳必躬必親許國年沈太宜

人搗柱門戶內外井井金和沈太以故寅亮無內顧憂道光辛

卯秋寅亮抱病卒子昌福僅八歲許家綦貧傳金氏下撫遺孤上

事尊嫜縣志刺繡紡績以資生計許傳日用瑣屑金傳專賴十指拮据

縣志無瘁容亦無憂色諸姑姊妹或勞苦之氏曰吾分也傳金湖俗信鬼婦女多入廟燒香氏獨不為所惑嘗曰以嘉言懿行為子孫講解可以身體力行因果之說未足憑也人服其識見之超

縣志

周良苗妻許氏儒家女相夫孝友脫簪珥陰行善事良苗卒生

計頗絀譚獻許太夫人傳氏力貧撫孤教四子皆成立卒以勤儉起其

家鍾文蒸放婚嫁畢氏綜家政力儉以率後人益好施子譚傳每

歲生日鍾記輒取燕賞之費以賑貧卹嫠施湯藥沈秉成放生會跋或創

焉或助焉垂十年不倦每事各費錢數百緡鍾記同治十三年年

八十子孫將舉壽觴治牢醴饗客氏正色曰汝曹忘先君樂善

未竟之志耶未亡人倖致八十乃戕物命以供燕笑烏乎可立

斥錢五百緡創放生會約鄉里當生辰輒節費以聚生物放之

山澤迄今不廢譚傳

吳烈女吳縣人家貧鬻於南潯張姓為婢端重勤慎有大家風

為主婦所鍾愛馬要沈彬元聞其賢聘為室委禽甫半月彬元

以暴疾卒女聞耗毀容茹素有終守之志示意主人主人慮有

他變佯領之年餘復為議嫁女遂伺隙自經死時光緒五年閏

三月八日縣志

蔣壑妻吳氏下塘田吳楷女讀書知大義事姑錢暨祖姑王皆

能恪守婦道相夫以敬性仁厚生平無疾言遠色雖婢僕不加

呵叱好施與推解不吝咸豐庚申壑遭危疾氏割臂肉和藥以

進疾竟不起氏痛不欲生誓絕粒以殉家人百計勸慰之始稍

進飲食從此不茹葷酒撫諸孤俱成立光緒庚辰冬卒年五十

七守節凡二十一年蔣錫祈先妣吳太宜人事略

周昌大妻董氏同邑董邦基女庚申寇亂楊葆光董昌大擊眷屬避難由鄉而滬而浦中間關轉徙不常厥居氏襁負子女從

行備嘗艱苦天寒冰凍至跪船舷親椎冰供汲洗鄭傳笈董同

治紀元後浙江漸次肅清昌大出入兵燹間懋遷有無家略裕

周慶森董太宜人行狀亂定歸里氏自奉儉約楊傳如食貧時鄭傳雖有婢僕

躬自操作楊傳性和平里黨內外皆稱爲易親然課子甚嚴祁寒

盛暑弗令輟誦讀鄭傳五十歲後婚嫁都畢浣濯猶不倦諸子婦

效之且請少息則曰吾非不知今日之可以安逸而故爲是也

誠欲使子孫知勤儉足以持久而奢惰之足以敗家也人情莫

不好逸而惡勞孰知航安逸卽足以敝其身傾其家耶吾雖老

猶不敢存此念以敝我精神則凡少者與夫老而未及吾者其

可不吾若耶吾無厚望於子孫能守吾之勤儉以保其身保其

家則吾願畢矣氏生平不苟言笑不佞佛不事鬼神而樂善好

施歲糜鉅款無吝色病中鄰家索催生藥時已夜半強起檢與

之其爲善不懈類如此楊傳昌熾妻沈氏桐鄉庠生寶賢女性靜

穆無疾言遽色周氏家譜年二十歸于周無所出爲昌熾納簞室閨

門之內雍雍穆穆無間言也有不幸夭折者遺女僅三齡撫之

如己出有粵人棄妾年幼無所歸氏留爲義女擇婿而嫁之昌

熾嘗客石門姚氏自姚氏中落貸白金五千及病亟與沈氏謀

召姚氏子與訣而焚其券人謂非氏無此卓見其他率眾以儉

列女一

御下以寬猶其餘事

楊藹光味六
公沈恭人傳

溫晉妻周氏本鎮周良苗女晉卒氏年二十二遺孤善基生甫四十日家寒以十指自給常依外家事母盡孝母晚年得風痺疾四支不仁起居胥賴扶掖垂十餘年不懈迨善基成立又中年不祿氏時年六十有七媳又早死遺孫洪寶僅十三齡狼狽相依者又近十載至七十五歲卒撫孤兩代守節五十四年光緒十二年 題旌 周氏家譜

明較著也

徐延祺珊
姑小傳

劉保康妻陸氏震澤陸萬豐女婚未朞月粵匪掠南潯氏舅達泉挈家避既登舟矣保康為其師運家具出而復入寇大至不得出遂失去當是時存歿固未稔也氏恐傷舅姑心制淚抑痛若無戚容至宵深人靜則有哭無睡目盡腫旋失明同治四年難平舉家返悉保康被害實耗乃招魂以衣冠葬撫叔氏子安仁為嗣每遇宗親喜宴衍稱賀氏嗒焉坐室隅不笑亦不言人恆憫之己卯夏病篤日昨夢與亡人晤殆不起矣竟歿年四十有三守節二十年光緒十六年 題旌 劉錦藻叔妣
陸孺人家傳 建坊于宗祠前 采訪

董春齡妻萬氏萬生庭次女工詩善畫尤精女紅年二十三歸

春齡孝翁姑睦妯娌伉儷綦篤光緒十六年二月十二日夫病卒氏不語不泣形神若喪乘人不備仰藥以殉臨終進其夫兄弟而泣曰翁姑雖年邁有伯叔在予歸董五六載曾不能產一男以爲予夫一綫之續希望旣窮生亦奚爲翁姑當予亮至身後若何伯叔當爲我料理之可無論已言訖而逝時距夫死僅半日耳年二十有九

采訪冊

李承初女蘊姑字同里吳能臣未嫁能臣死訃至家人祕不使知時竊竊私語蘊姑覺之屢覓死不得旋以哀毀致疾卒年二十四乃歸柩于吳而合葬焉

李氏宗譜

生員邱培恩妻沈氏候選訓導沈善鈞次女性貞靜事翁姑盡孝年二十八夫亡守志撫遺孤督責綦嚴雖處境豐厚而持家

儉約旋得心疾鬱鬱以卒年三十八光緒二十六年 題旌

采訪冊

張輔妻周氏郡城周杏樵女年二十六夫以痢疾亡氏痛不欲生欲投繯自盡經家人勸慰以夫無昆弟況有遺孤且重闈在堂仰事俯畜義不可殉氏領之其長子方六齡次甫生十閱月含淚鞠育以至成人氏性亢爽而和以接物人無閒言守志三

十七年宣統二年卒年六十有三

采訪冊

李邦治繼妻張氏震澤庠生張古香女秉性和平宅心孝友

吳凱

等壽婦 睦妯娌撫諸姪人無閒言夫病翻胃侍湯藥操井日持

邀恩稟

籌握算氏一身任之夫歿子廷賡已授室次光霽年十一氏勗兒輩銳志讀書勿分心家務米鹽瑣屑仍躬任其勞粵逆擾浙

子先後被掠日夜倚閭憂愁萬狀越兩月乘閒脫歸氏喜過望後廷廣昆季補弟子員文名藉甚從學者眾束修所入藉以養親歷數十年門庭秩然子且兩鬢如霜而氏猶必澣濯躬親主持家政年登大耋神明不衰白頭昆季事必請命奉慈母如嚴父焉以年屆百齡光緒二十八年請於朝 旌表如例李氏家譜

謝書紳妻湯氏同鎮湯學濂女于歸甫逾月而書紳病病數月竟卒氏欲以身殉女黨察其有娠責之意稍回已而產一男即慶麟也家奇貧藉女紅以養盛暑祁寒必漏盡始已道光二十九年湖屬大祲米價騰貴無以為炊疽發於背血縷沾衣手紉針不輟見者憐而敬之次年姑病歿適歲除無可告貸盡典所有以成禮嗣避粵寇之難出生入死更無一日安慶麟商於海

上家漸起心稍稍寬然性習勞苦家政仍躬任之光緒三十四年卒年八十六歲居六十六年 題旌如例初書紳兄弟三人仲早卒長書元娶吳氏書紳卒後五年書元亦卒遺一子繼殤姊妯賴慶麟延一綫勞苦共之劉錦藻謝節母湯夫人傳吳氏同治二年歿年四十一歲守節十六年上海縣志光緒七年 題旌時有一門雙節之譽劉傳

湖濱王氏婢媵於鎮北張某家名愛姐逸其姓張夫婦早卒子幼為撫養代綜家政迨少主長已娶婦乃居朝真堂焚修性和藹尚樸素居廟中誦經甚虔所履之磚成二足痕終身不嫁清淨以終卒年四十餘張氏子孫為之歲時設祭焉又某氏婢名瑞香主婦卒後誓不適人潛修于朝真堂方李氏欲建此廟也

瑞香與愛姐二人實助成之二人爲擊木魚走市肆中募資歷

久不輟廟卒以成未幾卒於廟采訪冊

邢勝奎妻李氏年十七歸邢甫七月夫亡茹苦守志父夙擅岐

黃術得其傳因以醫稍稍自給長齋繡佛募資重建朝眞堂居

之焚修禮誦諸婦女之樂潛修者羣往依焉守節五十餘年卒

于廟光緒二十六年 題旌建坊于朝眞廟前采訪冊

工部郎中劉安瀾妻同里邱其樑之女采訪冊舉止端靜不苟言

笑光緒乙亥歸于劉晨夕侍奉得堂上歡安瀾入爲工部虞衡

司郎中南北鄉試均未售抑鬱而歿氏欲以身殉堂上憫其少

孀又無子命弟之子承幹爲嗣且詔之曰而有子矣撫育之足

繼吾兒未竟之志乃涕泣受命自是撫承幹出入顧復繆荃孫劉母邱

夫人傳 恩勤不可殫述性好施予尤以振災爲亟疾革時垂念海

州災黎語承幹輸巨款拯海州之難歿於宣統己酉王先謙劉母邱夫人

墓志 年五十守節二十五年 旌表節孝采訪冊

周慶奎妻徐氏名熙珍江蘇試用縣丞海寧徐鴻逵次女溇溪詩徵

性聰慧知文字有華蕊樓吟稿一卷周氏家譜稿中存詩若干大抵

溯源於劍南石湖漸窺香山義山門徑王廷相華蕊樓遺稿序筆情眞摯

意致纏綿頗合風雅詩人之義曹鏞遺稿序年二十二而卒周氏家譜

張令如繼妻潘氏潘建成女年十六嫁令如咸豐四年夫亡距

成婚未及三月遺腹生女撫前妻遺孤備嘗艱苦歷十餘年其

孤又亡女嫁後未幾亦亡氏孑然一身守節六十五年卒年八

十三采訪冊

南溟志卷二十四終

